

摘藻堂四庫全書薈要

集部

欽定四庫全書薈要

集部

御定歷代賦彙外集卷八

詳校官候補通騎經歷臣郭祚熾

欽定四庫全書薈要卷一萬七千三百六十七

集部

御定歷代賦彙外集卷八

懷思

懷土賦有序

晉
陸
機

家漸久懷土彌篤方思之殷何物不感曲街委巷
罔不興詠水泉草木咸足悲焉故述斯賦

背故都之沃衍適新邑之丘墟遵黃川以葺宇被蒼林而卜居悼孤生之已晏恨親沒之何速排虛房而永念

想遺塵其如玉眇縣邈而莫覲徒佇立其焉屬感亡景
於存沒惋隕年於拱木悲顧盼而有餘思俯仰而自足
留茲情於江介寄瘁貌於河曲翫通川以悠想撫征轡
而躑躅伊命駕之徒勤慘歸途之良難慙棲鳥於南枝
弔離禽於別山念庭樹以悟懷憶路草而解顏甘堇荼
於飴苾締蕭艾其如蘭神何寢而不夢形何興而不言

懷退賦

晉 潘 尼

伊疇昔之懷憤思天飛以遠迹望循塗而投軌遡翔風

以理翮冀雲霧之可憑希天路之開闢何時願之多違
奄就羈以服役困吳坂之峻岨畏鹽車之嚴策嗟遊處
之弗遇奚鬱悵之難任背宇宙之寥廓羅網罟之重深
常屏氣以斂迹焉遊豫以娛心傳釋版以亮殷望投竿
而相姬窮獨善以全質達兼利以濟時聃安志於柱史
由抗迹於高箕理殊塗而同歸雖百慮其何思敢因虛
以託譚遂逡巡而造辭

思田賦

梁陸倕

歲聿忽其云暮庭草颯以萎黃風颼颼以吹隙燈黯黯而無光獨展轉而不寐何增歎而自傷於是踟躕徙倚顧景興懷魂煢煢以至曙綴予想於田萊彼五畝其焉在乃爰泊乎江隈出郭門而東驚入淑浦而南迴爾乃觀其水陸物產原隰形便林藪挺直丘陵帶面臨九曲之迴江對千里之平甸風去蘋其已開日登桑而先見聽啁哳之寒雞弄差池之春燕臨塲圃以築館對櫺軒而鑿池集游泳於階下引朝派於堂垂瞻巨石之前却

翫激水之推移雜青莎之霍靡拂細柳之長枝感風燭
與石火嗟民生其如寄苟有胸而無心必行難而言易
幸少私而寡欲兼絕仁以棄智忽學步而舉趾又追飛
而厲翅瞻鹿囿而竊高仰疆臺而慕義歷四時於逝水
馳三稔於申臂望歸流而載懷情鬱悒其何寘

望故園賦

唐杜牧

余固秦人兮故園秦地念歸途之幾里訴余心之未歸
兮雖繫日而安至既操心之大謬欲當時之奏技技固

薄兮宣易售矧將來之歲幾人固有尚珠金印節人固
有為背憎面悅擊短扶長曲邀橫結吐片言兮千口莫
窮觸一機兮百關俱發嗟小人之顛蒙兮尚何念於逸
越余之思歸兮走杜陵之西道巖曲天深地平木老隴
雲秦樹風高霜早周臺漢園斜陽暮草寂寥四望蜀峰
聯嶂蔥龍氣佳蟠聯地壯繚粉堞於綺城矗未央於天
上月出東山苔扉向闕長煙苒惹寒水注灣遠林雞犬
兮樵夫夕還織有桑兮耕有土昆令季強兮鄉黨附悵

余心兮舍茲而何去憂豈無念念至謂何憤悃悽悄顧
我則多萬世在上兮千古居後中有一生兮孰為壽夭
生既不足以紉佩兮顧他務之纖小賦言歸兮余之忘
世徒為兮紛擾

懷鄉賦

有序

明丘濬

每因送人處憶得別家時此唐人詩也嗚呼為此詩者
其能深體人情者哉某去家今十有六年矣鄉土之思
無日而不展轉於懷徒以國家之制貤封之典必限以

歷官之歲月以故情事尚未申也去年冬友人劉君尚德應進士舉來京師久別而晤不勝空谷足音之喜今歲試禮闈不合而去某與尚德鄉曲交游中最厚者也因其別而動乎情方寸惻然有不能自己者因述中心所懷者以為賦一以寫吾鄉土之思一以慰吾母兄之望一以志吾朋友之別云

懷吾鄉兮何所渺雲山兮萬重界鯨波之浩漫兮途有梗之未通曰吾心之切切兮無日而不南征晝神想以

遐鶩兮宵夢寐而靡寧母氏垂白之待養兮伯氏獨立
以煢煢雖顯揚之足慕兮恒喜懼以交并桑梓蔚其深
茂兮昔可把而今拱耆舊日以凋謝兮哀纍纍其多壠
朝吾登乎金門兮夕偃蹇乎玉堂置身非不高兮信美
非吾之鄉入結羣仙之綬兮出聯七貴之鑣游從非不
多兮匪吾髻鬢之交退默默以獨處兮念平生之往事
宛山川與閭巷兮默其可指以示恨無縮地之術兮孰
插予以雙翅馳寸心於萬里兮幾將歸兮猶未惟人情

同於懷土兮豈以窮達而異彼志得而情遷兮乃獨非
人之類年洋洋其日往兮百歲幾何較富貴之與名節
兮所得孰多苟情義之不申兮焉用其他幸吾子之茲
來兮若聞足音於空谷也申申告吾以鄉曲之故兮語
再三而不以為瀆也或為之忻忻兮或為之戚戚或可
愕而可駭兮或可矜而可惜或慚而為之忸怩兮或傷
而為之怵惕崛然而興兮俄然而衰奄然其去兮儻然
其來歷寒暑十有六變兮恍如一瞬天人倚伏有必然

之理兮孰云邈而難信每促膝以劇談兮輒歎息而不
休情惓惓而不自已兮涕或浪浪以橫流方資其朝夕
以歲規兮胡數奇而弗售彼惟索驥以其圖兮曾莫知
神駿之求君子出處惟其時兮樂天知命夫奚尤又將
別予以去兮仍海上之仙丘闡天人之妙理兮傳嗣子
以箕裘翩翩然以遐征兮嗟欲挽而莫留夫吾辭以志
別兮因以寫吾之心行何以處我兮毋金玉乎爾音自
薊北而越南兮閱半載之光陰既沿復遡止且行兮杳

不知山高而海深抵瓊臺而見鄉人兮道予心之永懷也慰吾親倚閭之思兮曰不久請告而歸也

思歸賦

有序

晉陸機

余以元康六年冬取急歸而王師外征職典中兵與聞軍政懼兵革未息宿願有違懷歸之思憤而成篇
節運代序四時相推寒風肅殺白露霑衣嗟行邁之彌留感時逝而懷悲彼離思之在人恒戚戚而無歡悲緣情以自誘憂觸物而生端晝輟食而發憤宵假寐而興

言羨歸鴻以矯首挹谷風而如蘭歲靡靡而薄暮心悠
悠而增楚風霏霏而入室響泠泠而愁予既遨遊乎川
沚亦改駕乎山林伊我思之沉鬱愴感物而增深歎隨
風而上逝涕承纓而下尋冀王事之暇豫庶歸寧之有
時候涼風而警策指孟冬而為期願靈暉之促景恒立
表以望之

思歸賦

有序

齊
謝朓

夫鑒之積也無厚而納窮神之照心之徑也有域而懷

重淵之深余少而薄遊身

原本闕一字

防方思俄然萬里晚

而自省諒非一塗

余菲薄以固陋受靈恩而不訾拖銀黃之沃若剖金符
之陸離舟未濟而河廣途方遙而馬疲忽中寢而念厲
魂申旦而九移昔受教於君子逢知己之隆盼被名立
之羽儀沾宦成之藻絢羌服義而不怠宜臨岐而喻變
勢方迅於轉圓理好旋於奔電援弱葛而能升踐重岡
而不眩信禔福之非已寧悔禍其如見大明廓以高臨

吹萬忻而同悅跨神皋之沃衍奉英藩之睿哲承比屋
之隆化踵芳塵之餘烈懷齷齪之褊心無夸毗之誕節
竟伊鬱而不怡賴遐討於先哲紛吾生之遊蕩彌一紀
而歷茲自下車於江海涉青春於是時睠崇岡而引領
望大廈而長思雖曲街之委陋猶寤寐而見之况神交
而通夢眇河漢於佳期爾乃眷言薄暮南眺悠然方整
歸轡願受一廛老華城之直陌相洛浦之迴阡連飛甍
於故友接閒館以懷僊臨南場以藝藿寄北池而采蓮

睇微英之霍霍望水葉之田田乃翦山木不日為功非
輪非與去斲去礮夜索綯而繞繞旦乘屋而芄芄竹櫺
崎嶇而經北繩閑窈窕以臨東布茵蕭於疎櫟纖莢亂
於迴櫳於是籬插芳槿門拂長楊園桃春發窻竹夏涼
晨露晞而草馥微風起而樹香無芳菲以襲予空旖旎
於都房恒離居以歲月庸銷落而徒傷我聞時命有殖
無遷徵事或在求理未甄譬豐草之區別隨霜露而天
延背萱鮮於堂北尚幽幽而未捐苟外物以能惑亦在

應而無騫况朝霞之采可嚙瓊扉之飾方宣養以虛白
之氣悟以無生之篇豈加璧之贈可動執珪之位能纏
歸來薄暮聊以永年

思歸賦

宋 王安石

蹇吾南兮安之莽吾北兮親之思朝吾舟兮水波暮吾
馬兮山阿亡濟兮維夷夫孰驅兮亡噉風脩脩兮來去
日翳翳兮溟濛之雨萬物紛披蕭索兮歲逶迤其今暮
吾感不知夫塗兮徘徊徬徨以反顧盍歸兮盍去兮獨

金史四庫全書
卷八
何乎此旅

思歸賦

宋
王資深

祿有可慕祿有可去何則移孝為忠曾無內顧則祿可
慕而可據上有慈顏以喜以懼故祿可去而不可寓噫
吾父八十母髮亦素尚爾為吏負馬遐路嗷嗷晨烏其
子反哺我豈不如鬱其誰愬惟秋之氣至惻惻而感人
日興愁思側睇江濱憶為童子當此凜辰百果始就迭
進其珍時則有紫菱長腰紅芡圓實牛心綠蒂之柿獨

苞黃膚之栗青芋連區烏桺五出鴨脚受彩乎微核木
瓜鏤丹而成質青乳之黎賴壺之橘蜂蛹淹齧榱桴清
蜜膳羞則有鵝鵲野鴈澤鳧鳴鶉清江之膏蟹寒水之
鮮鱗冒以紫薑雜以茭首觴浮茱菊俎薦菁韭坐溪山
之松篁埽門前之桐柳僕侍不譁圖書在右或靜默以
終日或歡言以對友信吾親之所樂安間里其滋久切
切余懷欲辭印綬固非效淵明之所褊心恥折腰於五
斗蓋自成人以及今未嘗一日侍旁而稱壽豈得不決

去於此時將恐貽患於厥後

思歸賦

明 袁 衷

旅荒徼以羈處兮心忼忼而多憂陽春逝以流邁兮曜
靈迅馳而不留涉恢台之炎夏兮赫焦灼以鬱蒸瘴暄
瞠以中人兮觸沉疴以驟興寒熱搏而襲逆兮苦痞崇
之相乘乏單豹之內養兮二豎伏而伺升哀吾生之孔
艱兮逢百罹以備嘗進觸藩以跼蹐兮退曳尾而摧藏
嘉魯連之肆志兮雖貧賤其何傷世好朋而習佞兮懼

婞直之構殃遯幽谷以逾紀兮忽奔走乎遐方豈好爵
之我靡兮實簡書之可畏收孟明於三北兮蒙羸繆之
渥惠奉周任之炯戒兮勉陳力以就位冀鉛刀之一割
兮庶伐檀之無愧老冉冉之將至兮疾疢糾其相仍俟
河清之幾時兮恐朝露之易零誦夫子之雅言兮疾沒
世之無稱紛王事之鞅掌兮籲天閭而乞身積頽思而
浸息兮憎愠愉以怵惕喟中情之莫我察兮眷懷歸而
未得夜申旦以不寐兮就角枕而反側蟲薨薨以潛飛

兮聽空除之蟋蟀先秋氣以哀吟兮感時物之數易魂
營營以夢歸兮覩故鄉之髣髴歎驚寤以在牀兮怊惆
恍而愁愁昔鍾儀之囚晉兮操土風而不忘彼莊舄之
仕楚兮詠越聲以徬徨覽季倫之奏引兮思娛老於河
陽繹陶令之賦辭兮脩初服於柴桑人情各懷土兮豈
必經營乎四方余既不能徇華以苟祿兮又焉能棲棲
於此邦孔接淅以違齊兮軻濡滯而出晝欽疏傳之炳
幾兮脫桎梏於組綬梁歌噫以竄稽兮梅掛冠以遯吳

仲樂志於園藪兮張興思於蓴鱸鴻冥冥於寥廓兮超
矰繳而遠徂徂非斯人其誰與歸兮永逍遙於江湖亂曰
玄鶚黑鳥號寢宮兮鳳凰翩飛匿林中兮人各有心紛
不同兮靜躁殊趣貴中庸兮塊獨居此將安從兮我思
古人希哲蹤兮

思北歸賦

梁江淹

伊小人之薄伎奉君子而輸力接河漢之雄才擘日月
之英色絕雲氣而厲響負青天而撫翼德被命而不渝

恩潤身而無極何規矩之守任信愚陋而不肖愧金碧
之琳瑯慙丹腹之照耀樊天網而自離徒夜分而誰弔
遭大道之隆盛雖草木而勿履誤銜造於遠國出顛沛
之願始去三輔之臺殿辭五都之城市惟江南兮丘墟
遙萬里兮長蕪帶封狐兮上景連雄虺兮蒼梧當青春
而離散方仲冬而遂徂寒蒹葭於余馬傷霧露於農夫
跨金峰與翠巒涉桂水與碧湍雲清冷而多緒風蕭條
而無端援之唵兮日光迴玃之啼兮月色寒究煙霞之

繚繞具林石之巔岼於是臨虹蜺以築室鑿山楹以為
柱上曷曷以臨月下淫淫而愁雨奔水潦於遠谷汨木
石於深嶼鷹隼戰而槽巢黿鼉怖而穴處若季冬之嚴
月風搖木而騷屑玄雲合而為凍黃煙起而成雪虎蹏
跼而斂步蛟螭蝼而失穴至江離兮始秀或杜蘅兮初
滋桂含香兮作葉藕生蓮兮吐絲俯金波兮百丈見碧
沙兮來往霧益益兮半出雲雜錯兮飛上石照爛兮各
色峰近遠兮異象及迴風之搖蕙天潭潭而下露木蕭

梢而可哀草林離而欲暮夜燈光之寥迴歷隱憂而不
去心湯湯而誰告魄寂寂而何語情枯槁而不反神翻
覆而亡據夫以雄才不世之主猶儲精於沛鄉奇略獨
出之君尚婉戀於樊陽潘去洛而掩涕陸出吳而增傷
况北州之賤士為炎土之流人共魍魎而相偶與蠨蛸
而為鄰秋露下兮點劒舄青苔生兮綴衣巾步庭廡兮
多蒿棘顧左右兮絕親賓憂而填骨思兮亂神願歸靈
於上國雖坎壈而不惜身

懷歸賦

宋 沈 括

歸休乎嗟生亦勞兮歲常九行而一息四方已莫不異
兮欲終往而安即披荆榛以孤鶩涉大塗之梗塞投孱
顏以空入孰為眠而朝食警歛一山而百折兮況千里
之繇邈高浪鱗捲而電劃兮近不保乎咫尺嗟乎予乘
此而安之兮託扶搖以寸翮吾一念予之往兮意允兀
碑而屹栗彼夫人之聖哲寧有欲乎顛躓摩冥冥之無
窮抽萬世之潛默雖皎中而自信亦終壞坎而莫覲來

之不可與謀兮果去亦庸何惕既振轡而大驅兮盍倡
佯其所適期無羨於古人兮苟亦善吾之令德終曠蕩
之可驤兮信幽履之不惑

懷歸賦

明

徐禎卿

永濡跡於都邑歷壯覽以徘徊仰桂殿之宏麗峙天闕
之崔嵬配辰樞以作極扼喉襟之要樞臨飛閣之杳眇
倚曲檻而躊躇望靡靡而無畔廓千里而丘夷懷勾吳
之下邑嗟隔越之可悲心愴愴以增戀魂營營而外馳

豈茲土之匪樂哀故鄉之日違望浮雲之南翔慕征鳥
之東飛歎予躬之棲旅長淹留以何須大風鬱其夕興
振四野之黃埃天慘惻而沉晦失南北之輿陔樹木淒
其號戾鳥索羣而鳴哀愁塞耳而頽望掩愁思之彌彌
夜展側而不寐步客庭而踟躕戒膏秣以至旦逝言返
乎舊廬

歸歟賦

宋 楊萬里

繫端月之涉七兮諏其日則曰人倦予游於道路兮念

求以憩予神豈不愛窻月之娟好兮睡鄉徼予以卜鄰
曾不及於解衣兮遑暇脫予之中恍栩栩以一適兮忽
乎還家而及門忘予身之為羈兮驟喜覩予之親炯鶴
髮之垂垂兮一哂以勞予勤環兒女之挽鬚攬袖兮犬
雞亦為之載欣予親呼酒以予酌兮奚未舉而既失驚
客舍之已晨兮牕不見月而見日風挾寒以薄人兮巧
尋罅以入室纔予親之膝下兮夢覺而千其里湛清臚
之易溢兮潛予面其如洗推予枕其不能寐兮捐衾裯

而又不能起嗟予生之艱勤兮墨兵納我於學林慕黃
口而輕予之明月兮以耒耜而易搢紳既自山海之棄
而粥於市兮又何歎池沼而籠馴羌初心之豈其然兮
亦曰負米而為貧家焉釜吾親兮公爾以芹吾君惟是
行之猖狂兮隨薦書以叫閭謁帝久而乃覲兮豈不就
於一列其如釜甑之空兮履無當而衣有結樂調飢而
濟渴兮總幸有曾冰之與積雪仰王都之造天兮非都
盧其奚躡久而顧予之蹙足兮欲自乘於汗血夢歸而

不歸兮不念吾親之指嚙歸歟歸歟豈南溪之無泉兮
南山之無蕨

歸去來賦

宋 王十朋

歸去來兮終日思歸今已歸嗟連歲之行役兮誤甘旨
之屢違身雖處於異鄉兮念長在於庭闈陟高岡而東
望兮悵白雲之孤飛食藿鹽而無味兮悟蝸角之真非
泛李卿之竹葉兮詠晨光之熹微辰未浹而到家兮指
青燈而扣扉粲慈顏於一笑兮紛稚子之牽衣雖吾歸

之不若人兮不能衣錦而乘肥吾將以此而易彼兮學
何蕃其庶幾

宣歸賦

有序

明
李夢陽

正德九年是歲甲戌厥月辛未臣以居官無狀得蒙寬
譴罷歸迺作宣歸之賦其辭曰

昭浮清以覆育兮北斗平均而酌時螽蛄微細而先秋
兮水知寒而流澌疾余生之蠢特兮性重剛而習坎吾
既倖直獲斯厲兮孰復訟心於顙領悲羣志之詭異兮

恒忌勝而營己與己好則曰好兮忍憊蛾眉而攻毀繫
聖人無小大兮吾聞大道以天下為公彼黨同以掩飾
兮擊非儔而謂忠惟古人之醜偽兮迸四夷而投北胡
今士之婪穢兮廉之則云伐德帝板板以遼廖兮九天
立而雲征清汶汶以瀕夢兮豈察詳而悉情滂澄清厥
躬殆兮原靡豫而遭放美余焉獲茲嘉閒兮詔冠帶以
流浪晨靈雨以揚櫟兮遡江漢之滔滔背朱明之游颺
兮面長庚而北邁瞥九江余智儵兮超大別而逾迅介

夢澤以洋洋兮風沔郢以遵順宵認參昴兮晝諦波濤
痛定思痛兮瘋前車而內忉衆乖滑以善憎兮噉沓嗒
而背訛譎嫵嫵以朋附兮瑣刺齧而陽紿艷余惡以披
離兮矯九仞之翺翺趨溷悶以孤爰兮巢雲柯之蔽蒂
彼叢噪以側睥兮含沙射而伺予夥千百以一致兮標
寤言而誰語陋嚶呻之僞態兮禱偃僂唯趙趙生捩直
俾之曲兮民炎門礪而肉魚腠膏血以日富兮佯減儉
以豪素哀窶人之填寡兮彼醲鮮袒而號呼心與迹既

我逆兮焉飲食之遑寧憤粉飾之亂姣兮疇知余結駟
而憑膺時鑠金之冰鬚兮吏抱牒環而相勿汗藪藪以
零案兮風薄肌之瑟瑟怲潰澮以煩擱兮念偃仰之不
可得報束帶以例趨兮衷眩戰而狐惑徒文繡之外彪
兮內棘戟其誰知思翫慢以鑿遷兮則又懼素餐而神
災吾寧轟烈劣撒與世還兮良不忍骯髒齷齪與草木
而塵埃惟代謝之飄忽兮慨顏蹠逝而黃丘究萬變以
定命兮孰長存而竟留懲夙昔以質行兮吾幸夫前路

之尚脩余指日月之顯隅兮迴巖阿而槃考徒桑若以
敷蔭兮移嵩華而分島仰峰巒之嶽岑兮俯泉瀨之磻
磻穆官助以潛處兮探理窟之英邃合性命而論一之
兮周覽陰陽之轉圜橫宇宙以長觀兮驗妙門之玄玄
混沌及而天地覆兮堯桀泯而誰分篤述作以強志兮
吾豈願來者之盡聞

述歸賦

有序

明

何景明

僕聞之殊途者不可以同觀異趣者不可以強翕故嗜

竿者不媚之以瑟好圓者不進之以矩何則殊途而異
趣也故賈子投荆南仲舒屏江都屈原游澤畔三子者
非容之不能謀有不合有不可以容者矣故射者不為
人易其彀琴者不為人改其操故師可易而法不可易
也是以物有不以貴易賤富易貧榮易辱者矣故茂草
不負垣美穀不生轍懼所托者非也是故求樂其心者
不求華其身求顯於後者不求耀於今故夫子周流刪
述墳典筆削魯史左氏著國語馬遷紬史記荀卿董子

之流皆有論譔大抵困屈窮阨發憤述作茲數聖賢者
寧徒耀於當世哉僕少執寡昧竊有慕於古人之義弱
冠即仕出入班行者已越六歲頗有齟齬之歎焉正德
戊辰皇上御極之三年詔許罷歸鄉里得侍親膳既荷
洪宥殊協夙情於是始欲究著作之原博覽歷之勝竊
附一家之傳庶艾不稱之戒僕嘗以漢之文人工於文
而昧於道故其言雜而不可據疵而不可訓宋之大儒
知乎道而嗇乎文故長於循轍守訓而不能比事聯類

開其未發故僕嘗病漢之文其道駁宋之文其道拘反
復求斯尚未有得要之鄙意則欲博大義不守章句而
於古人之文務得其宏偉之觀超曠之趣至其矩法則
閉戶造車出門合轍不煩登途比試矣然又欲倣子長
好游之意抗志浮雲轍迹九有以博其大觀以成其文
章斯亦不墜古人之餘烈哉於是叙出處之槩援聖賢
之風揄始終之志作述歸賦豈敢自附於前哲用以勗
之於將來矣辭曰

有申氏之遺封兮吾顯祖乃肇家洎大人之有立兮遂
振藻而揚華爰伯昆之繼美兮惟末身以降予實獲夢
之曰吉兮日舍寅而筮嘉予既承此幼美兮懼服志之
不遐登隴坂之陂陀兮泛涇渭之洪波極嶠函之重塞
兮由惇物與太華覽豐鎬之餘風兮沂漆沮之遺歌究
城隧之湮沒兮哀二世之禍羅雖孺齒以隨侍兮虞年
歲之日加飭華驥以西返兮恐脩路之蹉跎忽天門之
廣開兮值日月之盛明願自飭以進君兮得近君之末

行鬱文昌之中興兮聳圖闕之卬卬揭華蓋於正殿兮
翼玉闥之與金庑塊層臺之隆起兮麗複道之委長儼
宮觀之榮瞻兮接脩翼而翱翔奉鸞車之清塵兮竊黼
帷之下光服恪勤於朝夕兮冀予衷之必揚倏天地之
易位兮星辰錯而無綱聿迅飈之亟至今會浮雲之徂
征憂雪霰之交增兮履中庭之凜霜紛衆莽之凋毀兮
恥孤栢之獨芳豈予情之耿介兮實悲夫蕙華之搖傷
顧涓忱之莫彰兮敢幸澤而干榮仰皇度之寬綽兮得

屏放於故鄉歲戊辰予南騫兮臨大路而高車眺玄宮
之闐曠兮倚脩城之曲隅泊潢潦之濡轍兮白日晷而
忽逾塵暖暖以蔽空兮風發發而揚衢視僕御之零涕
兮驂悲俛而不驅遵涿野之通行兮經蚩尤之故墟陟
燕昭之崇臺兮訊樂毅之所居覽冀州之圯址兮式有
虞之故都出晉野以于邁兮行谷旦以逶迤下滹河之
隄洲兮接邯鄲之脩途企魯連之風烈兮雖異世其勿
渝懲奢麗之覆亡兮憫豪盛之靡餘朝予濟乎洪河兮

夕弭駕於淮瀝逝逍遙於故域兮耽極樂於桑梓治丘
墓之穢草兮考先祖之德裔侍顏色於閨闈兮服左右
於居起分崖谷以畢處兮辭纓綉而不縻啓衡門而葺
茅兮循蘭徑之委委藝嘉菊之百畝兮采芳若於中沚
伊予既東茲之超寂兮恐邁吾之盛年檢古人之遺美
兮心竊傲而不敢愆樹六藝之旌節兮散百家之遺編
殫仁義之遐風兮略眇小之陋觀下何探之不幽兮上
何求之不玄乘二儀而列三光兮揜九區與八埏揚素

筆之芬烈兮修薄辭以為篇綴大賢之緒論兮紹斯文
之未傳曷章句之足守兮發矩矱之自然汲時日以迅
厲兮惡名稱之不延昔夫子之喪位兮迺周流而轍環
望龜山之蔽翳兮去魯國而盤旋臨河水之洋洋兮托
哀操於鳴絃疾予心之迫隘兮願輕舉而遠旃羌筮日
以造游兮嚴吾驂之翼翼飭桂衡之超駕兮褰采旌以
前飾乘白螭於上襄兮曲文蜺於兩服張孔雀之翠蓋
兮諧鸞音於下輻施結璜之委佩兮謹垂輦之儀式涉

洛水之靈波兮恐宓妃之不得使文魚以媒之兮怨約
言之我食抗予力於江南兮秣吾馬於漢側豫遊女之
不信兮解予袂以明德順湘流而下沿兮望九疑而夕
發從二妃以並翔兮忌神人之相越離江夏以東邁兮
覓吳越之所在弔夫差之故宮兮尋伍胥之濤瀨痛麋
鹿之游宮兮惋鷓鴣夷之被害極禹穴之幽冥兮窮會稽
之勝槩慕泰伯之清聖兮欽季札之耿介勗余馳以流
汎兮安崇卑之不臨北旱海之爛灼兮西太素之積陰

水汭結以承輿兮霜霰零而接岑南陸屈以暑徂兮或
綬蛇之陵侵取岵夷以極行兮盼東海之漫淫休天地
之冥晦兮懼陵谷之隳沈速反轍以旋服兮息余丘之
茂林終養恬以順年兮厭予心之所謀世清濁而莫察
兮脩短錯而不倫芻桂芝以秣蹇兮吝糠粃以飼人豢
罷牛而被以文服兮良馬棄而不陳賤馨烈而不御兮
反逐臭於海濱予憂乎鳳凰之不鳴兮豈云係夫麒麟
彼蘭草之國香兮斂空谷以自珍聊委順以祈齡兮吾

又安尤夫人亂曰南有嘉木有鳥居之朝破其巢夕則
去之代愈下兮詩書道微曷曰予不還歸即彼昭昭去
彼汶汶今則靡榮後有問兮

感離賦

有序

魏文帝

建安十六年上西征余居守老母諸弟皆從不勝思慕
乃作賦曰

秋風動兮天氣涼居常不快兮中心傷出北園兮彷徨
望衆墓兮成行柯條慚兮無色綠草變兮萎黃感微霜

兮零落隨風雨兮飛揚日薄暮兮無怵思不衰兮愈多
招延佇兮良久忽踟躕兮忘家

感別賦

有序

晉傳咸

友人魯庶叔雅量弘濟思心遼遠余自與之相長情相
親愛有如同生其後選太子洗馬俄而謬蒙朝私猥忝
斯職雖懼不稱而喜得與此子同班共事天下之遇未
有若此周旋三載魯生遷尚書郎雖別不遠而情甚悵
恨退作茲賦云爾

嘉天地之交泰美萬物之會通悅朋友之攸攝慕管鮑
之遐蹤退以文而會友欽公子之清塵信同聲之相應
意未寫而情親誓稚好之齟齬分綢繆而日新蘭蕙含
芬有時而馨龍驥跼足有時而征乾道變化時惟大明
綦綦睦友載揚厥聲降聖宰之旌招曜羽儀之上京贊
唐虞之嘉運超飛躍乎太清佩銀璜於帝側拖紫艾於
天庭瞻宸極之眇眇喜吾子之寵榮無荆玉之夜觀猥
齊景於夜光敢有覲於斯舉欣與子而並翔天啓其願

自忝頻繁幼則同遊長則同班同心厥職其臭如蘭庶
績未凝聖朝疇咨顯佐納言先綜萬機出順景而為偶
入闐然而無依步虛宇以低迴想宴笑之餘暉竟纏絲
而彌結淚雨面而霑衣

感別賦

有序

明
皇甫汈

戊申之秋八月初吉季弟水部郎子約以制滿還闕而
余羈紲都亭移書告別發函披誦悲不能勝嗟乎丈夫
之生自懸弧矢以來孰不有志於四方故曰人豈鹿豕

也而可常聚乎此光祿之賦惜其淵雲詞靡而病於兒
女情多蓋別不足以興悲而情有所感於別則悲可知
矣因謨茲賦以代餞云爾辭曰

別方異緒離狀殊端在有情而必款豈同氣而能堪輶
車陳於垆側舟楫戒於江干或感慨於川逝或行嗟乎
路難涕臨觴而共拭心執袂而俱酸善哉江生之言曰
黯然以銷魂值我愛弟適往帝閭愧雙鵲之並舉兮矯
乘鴈而孤騫若夫未營四方聊事一室侍讌庭聞聯經

几席辨索研墳游璣討歷繹孟氏之有三詠詩人之既
翕至其恭承嘉惠忝竊龍光仲兮叔兮乃以軒而以翥
伯也季也復載翱而載翔或影纓於建禮或結綬於文
昌或馳麾於趙魏或沿牒於楚湘乍乖雲雨少別關山
旌指洛而將赴裘滯秦而未還行行路何極去去情不
忍寄芳草於春池攬素毛於秋省夏暑溽而扇違冬飈
厲而衾冷顧奚別而非悲抑奚悲而云甚迨夫丁辰荼
酷軫患纏繇乾覆奄奪慈景俄殲悼金昆之脆質凋玉

樹於華年同朝露之湓盡展夜壑之已遷緊慶往而弔
來亮福倚而禍伏豺狼逞凶蜂蠆隱毒構曾參為殺人
收張儉而屬吏謂死灰其不燃詫凝脂之可畏投清流
使合汙惡獨醒而強醉胡人心之險巇兮亦天道之冥
昧賂苟輸而在宥兮囊無金之可致鄒投珠而遭盼兮
和抱璧而蒙冤乏文姬以請駟兮望融弟為急原得與
喪其齊塞兮退未遂而觸藩肆蒼鷹之亂紀兮實桀犬
之餘孽隕東晉之玄風兮黜西州之英烈誰百口其相

鳴兮空撫鏡而存舌中郎奮於鉗徒兮應相起於溺摺
尚錄過於代門兮布揚芬於漢闕將逆施於末路兮終
雪恥於前哲斯時也雖具邇其含悃矧駕言以遠別遵
首路之逶遲兮睇蕭晨之淒緊憑江閣之交疏兮見中
洲之帆影淮水落而彭城荒燕雲飛而冀門近想天上
之仙班恍夢中之幻境粲西笑而心搖託南樓而迹驚
追二陸於疇昔兮緬兩到之徂征置美酒以高會兮列
祖讌於華楹徵綺羅之妙舞兮被絲竹以新聲懼堂中

之蠟燭忘戶外之驪鳴雖擬跡而同別亦原悲而異情
憤世道之黷黯兮請以余為殷監衆女嫉茲蛾眉兮均
自沈於明豔客方誠乎用光兮嵇弗戢而罹患雲賦就
而晚疲賈書上而早譴齒何貴而象焚轡乃災於豹變
庶養德於木雞毋處才於能鴈辟涉海而獲濟兮諳風
波之苦辛傷虎口而幸脫兮猶心悸而告人疾已瘳而
復初兮舉藥石以具陳羽有落於虛彈兮咎無蹈於震
鄰紛余季之玉秀兮又襲之以蘭芳振逸響於寥漢兮

赫挾藻於明光恩被命而優渥兮德潤身而彌彰渺岐
分於川岳兮瞥星散於參商季昔時兮送余余今日兮
送子若迭代於天運匪往復於人事喜何劇而無悲悲
何窮而無喜情生文以叙離詞因情而斂思腸屢絕於
停毫泣欲盡而盈紙願行者其勉旃惋居者之已矣

歎別賦

梁劉潛

在羈旅兮為思每居常而不樂意難偕於貽蕩情易邀
於隕穫愁非招而自來憂試排而不却退求己以自省

慨撫衿而太息位不俟於一進髮徒彰於二色名有似
於務耕學無均於譬織在初歸之為慶庶因拙而自收
保私庭之宴喜共昆弟而嬉遊校小文於搖筆比楷式
於臨流止每歡於接膝行如喜於同輶忽一去而數千
遂離居而別域阻同被於當寐乖共餐於終食唯憑遠
望以代歸負相思其無力

離別賦

有序

梁張纘

太常劉侯前輩宿達余在紉綺之歲固已欽其風矣及

理棹江干攬涕還望采蕭之詠不覺成篇

彼劉侯之矯矯承世德之清輝挺荆衡之菌輅輝江漢之珠璣昔相知於一定逾盛衰乎二紀豈因媒以成親非彈冠而來仕分自諧於金石情冥符乎蘭芷忘時輩之後先略相知之年齒及胥遇於雲閣又方駕而聯曹宵擁衾而暗語晝稅鞅以遊遨案方前而等食衣共體而同袍猶合歡之蠲忿如來蘇之釋勞惟吾人之與子兮諒不言其已召在百代而奚殊雖千年而同調寧風

波之所移豈流俗之能要非高唱而云擬逢下士而或
笑隔顧言於信次尚眷眷而興懷矧雲崖之遠訣抱離
袖而長乖顧龍門而掩涕瞻郢路而何偕在驚禽之屢
感迫徂年之長暮眺湘沅之分流遵洞庭之永路山峻
高而易隱浦迢迴而難泝猿啾啾而夜吟鵲騷騷而曉
度撫客子兮何心能辭鄉兮別故挹荃蕙之遺芳共離
披於霜露

別賦

梁江淹

黯然銷魂者唯別而已矣況秦吳兮絕國復燕宋兮千
里或春苔兮始生乍秋風兮暫起是以行子腸斷百感
悽惻風蕭蕭而異響雲漫漫而奇色舟凝滯於水濱車
逶遲於山側櫂容與而詎前馬寒鳴而不息掩金觴而
誰御橫玉柱而霜軾居人愁卧恍若有亡日下壁而沈
彩月上軒而飛光見紅蘭之受露望青楸之離霜巡層
楹而空掩撫錦幙而虛涼知離夢之躑躅意別魂之飛
揚故別雖一緒事有萬族至如龍馬銀鞍朱軒繡軸帳

飲東都送客金谷琴羽張兮簫鼓陳燕趙歌兮傷美人
珠與玉兮豔暮秋羅與綺兮嬌上春驚駟馬之仰秣聳
淵魚之赤鱗造分手而銜涕咸寂寞而傷神迺有劍客
慙恩少年報士韓國趙廁吳宮燕市割慈忍愛離邦去
里瀝泣共訣投血相視驅征馬而不顧見行塵之時起
方銜感於一劍非買價於泉裏金石震而色變骨肉悲
而心死或迺邊郡未和負羽從軍遼水無極鴈山參雲
閨中風煖陌上草薰日出天而曜景露下地而騰文鏡

朱塵之照爛襲青氣之烟煨攀桃李兮不忍別送愛子
兮霑羅裙至如一赴絕國詎相見期視喬木兮故里訣
北梁兮永辭左右兮魂動親賓兮淚滋可班荆兮增恨
惟樽酒兮叙悲值秋鴈兮飛日當白露兮下時怨復怨
兮遠山曲去復去兮長河湄又若君居淄右妾家河陽
同瓊珮之晨照共金爐之夕香君結綬兮千里惜瑤草
之徒芳慙幽閨之琴瑟晦高臺之流黃春宮閔此青苔
色秋帳含茲明月光夏簟青兮晝不暮冬缸凝兮夜何

長織錦曲兮泣已盡迴文詩兮影獨傷儻有華陰上士
服食還仙術既妙而猶學道已寂而未傳守丹竈而不
顧鍊金鼎而方堅駕鶴上漢驂鸞騰天蹕游萬里少別
千年惟世間兮重別謝主人兮依然下有芍藥之詩佳
人之歌桑中衛女上宮陳娥春草碧色春水綠波送君
南浦傷如之何至迺秋露如珠秋月如珪明月白露光
陰往來與子之別思心徘徊是以別方不定別理千名
有別必怨有怨必盈使人意奪神駭心折骨驚雖淵雲

之墨妙嚴樂之筆精金門之諸彥蘭臺之羣英賦有凌
雲之稱辯有雕龍之聲詎能摹暫離之狀寫永訣之情
者乎

別賦

明 陳子龍

漫漫長道悠悠我心揚舲極浦總轡荒林與子言別愴
然哀吟仰視浮雲倏忽難尋我有旨酒慨慷酌斟况秋
風兮渡河又落日兮在野葉蕭蕭而羣飛泉淙淙而始
瀉指寥廓於翔鴻愴悲鳴於去馬覩徒御之紛馳傾芳

樽而不下含別緒兮孔多欲陳辭而難寫於是攬袪徒
倚執手踟躕會當去我頃刻相逾聽車音而絕響望襟
幃而載徂况懷人之極目愧送子之賤軀掩金鏡而罕
御理瑤琴而常孤仰明月之迅邁悵重關之崎嶇言念
古昔誰與為比至若祖道浙江歌驪易水擊筑漸哀舉
杯數起入虎狼兮不復還感烏馬兮誰能理信事君兮
無二心憤國讐兮慚壯士獨臨風以唏噓或攀轅而莫
止乃有河橋送客灞上辭人奉使隴外之官漢濱念殷

勤於京洛忽散漫於風塵嗟官局之有守欲翰飛而無
津陳嘉核於錦幄寫繁奏於陽春日行暮而款款車遵
道而鱗鱗又有陷敵避讐遠適異國隱漁艇於江南築
高臺於塞北望舊里今天涯遇故人兮相匿逝將別以
起舞臨交歧而置食託黃鵠而神傷撫瓊枝而歎息至
若廬江少婦文園小姬恩方膠固義當乖離痛寶玦之
既賜出金屋而長辭陳后長門之賦班姬紈扇之詩一
朝失職相見無期瞻鑒聲於咫尺慨音徽之永違更若

漢武好武絕域稱藩賜美人於朔漠嫁公主於烏孫夏
積雪兮天山春無草兮玉門莫不凜乎變色悽然斂魂
改紅顏兮白髮掩青塚兮黃昏思金堂之縹緲念駕侶
之嬋媛又若妾居北里君成交河夜飛白羽朝負瑠戈
迷鳴沙之異響捲陰風而震波悲傳竇女望斷秦娥寄
文章於縑素託流怨於纖阿間邊烽之未靖悼玉貌之
蹉跎至有銅臺尚食之伎茂陵薦寢之女宮車晚駕曠
然獨處惜餘香之在幄顧遺容之無所憶緒言於生平

愴永訣於終古玉盃出兮人間魚燈明兮下土豈若上
宮麗質邯鄲名倡皎皎牕牖盈盈道傍解雜佩兮贈君
子折芳馨兮心內傷則有煙林花墮平皋草長青驄蹀
躑紅袖徬徨遠與君別各天一方飄搖分袂杳若參商
嗟夫別何年而不愁愁何年而能散陋羣遊於麋鹿壯
遐征於羽翰苟兩心之不移雖萬里而如貫又何必共
衾幃以展歡當河梁而長歎哉

別知賦

唐韓愈

余取友於天下將歲行之兩周下何深之不即上何高
之不求紛擾擾其既多咸喜能而好修寧安顯以獨裕
顧阨窮而共愁惟知心之難得斯百一而為收歲癸未
而遷逐侶蟲蛇於海陬遇夫人之來使闢公館而羅羞
索微言於亂志發孤笑於羣憂物何深而不鏡理何隱
而不抽始參差以異序卒爛漫而同流何此歡之不可
恃遂駕馬而迴輶山礚礚其相軋樹蓊蓊其相樛雨浪
浪其不止雲浩浩其常浮知來者之不可以數哀去此

而無由倚郭郭而掩涕空盡日以遲留

別知賦

元虞集

余忽忽處此之無故兮幾偃蹇以自窮逝斂裳以遐征
兮抗九霄之雲風頻三辰之徘徊兮遲後古以為期何
夫子之俤俤兮亦踉蹌而在茲吁嗟乎世德之浩浩兮
恥謂人以不賢陳珮玉於交達兮被徒輿以瑤環設厚
顏之鬱沉兮孰敢即問乎津涯發疾叫於咽嗑兮衆披
靡而莫支夫治倡之狐惑兮豈不足於內揆顧西子之

蓬垢兮益返忌兮令姿惟前聖之無悶兮老氏亦貴夫
知希顧涼薄之多懲兮猶慷慨而尚辭余固將去此而
無悔兮念夫子之與我日進余以不及兮又證余以其
可余嘗究往來之為道兮論因革之為權莫或知其獲
落兮子獨謂其固然庶久子以自輔兮克有間以時行
忽先我而南驚兮殆若為乎余情迺歌以送之曰長江
渾渾兮春多浪波白日耿耿兮擊楫為歌天薄我賦兮
非以病我吁嗟乎昔之盛者何其多

別友賦

宋 黃庭堅

曩聞義於孫李指尊選以見招惜予行之舒舒曰其夜
以為朝予望道於垓垣見萬物之富有恨逸駕之絕塵
又驂予以四牡喟後車之無策其四方乎索友仰雲飛
而注弋俯淵覲之沈鈞或一能之勝予忘日月之不予
謀或登吞舟之鱗或下垂天之翼手予弓而不釋恐斯
道之或息維廬江之四李三隱約於龍眠維若人之仕
蚤懷明月而麗川歲庚午而會梁語間道之大用吸江

漢以為深累丘嶽以自重尾擊之而首應西犯之而東
抗棄旗鼓而不逐儼其陳之堂堂偉道學之崇崛增懦
夫之激昂觀出日於東方雖食焉而不吝無肯綮以自
試居自喜於游刃彼覆却之萬方期斯言之猶信水渾
渾而進舟風剌剌而侵裘恐事親之不歡則推是之同
憂

別友賦

元
危
素

余生楚南之窮邦兮嗟不逮乎古之人執簡策以永歌

兮視前行之逡巡悵風氣之日凋兮衆糅雜乎滓穢獨
涼涼而奚適兮虞誹言之交至能服仁而蹈義兮雖顛
沛庸何傷顧操踐之或怠兮悲絲染之玄黃思驂雲螭
以高馳兮下覽觀乎四海帶玉璐而佩寶劒兮劃長嘯
乎天之外值美人於丹丘兮云抱朴之來孫朝吸上池
之沆瀣兮夕掇玄圃之芳蓀獵六籍之精華兮悲黃農
之不吾待並騑騑之良馬兮欲導車輪而言邁有疑義
而與析兮且交修予之慝豈私情之昵比兮將以緝乎

道德懷夫子之固窮兮雖制義而自安顧甘旨之或缺

兮寧孝子之所歡念一門之孤惻兮而衣食之莫具汨
奔走於泥塗兮歲冉冉而遲莫輟彭澤之孤權兮愛東
總乎錢唐撫句踐之故墟兮弔臺觀之榛荒颺高帆以
渡海兮揖羣仙於雲鵬凌扶桑而遐矚兮浴赤曦之曠
眎盼梅梁而太息兮企聖賢於諸馮何三千載之寥寥
兮大運若是其污隆繫娛遨之足樂兮傷馳驅之勞勩
扇朱光於炎宇兮安得激清風而來至旋輕輶於汝賓

兮將同采乎菟藿翫曾峰於翠雲兮射麋鹿以為樂亂
曰子何為行兮吳越之鄉兮韶音之鏘鏘兮矯首以望
虞皇兮邈矣夏禹海茫茫兮哀民生兮曷時而康兮

惜別賦有序

宋陳藻

漁溪諸友卅角相從或相識乍離乍合今歲偶聚向時
未生或初生者長成而卅角有逾壯齒矣二月始集講
論未幾槐花將黃次第分散余世事已懶筆耕亦倦日
嗜啜茶飲酒逍遙行坐締翫溪山之勝耳安能激厲諸

君哉閑謨數辭強名之曰惜別賦

場屋微名舉世營營有貴於己在人者輕人疑余兮未
貢余已官而改京買臣行歌咄哉小生爾既朱輪孰與
原憲終貧兮自得之榮況乎乘堅策肥旌旗擁路於青
史兮無聲噫天垂月兮山吐雲青草死兮地懷根一枯
一茂日代乎前皆仁氣之綢緼嘻哉諸君世務紛綸來
歲之春想無暇留醉翁兮談天地之醇六經諸子百氏
兮槩妙道之所存苟惟綴緝編類以得失為悲欣雖同

居而白首亦奚由兮愈親

懷別賦

元
吳師道

余悲古人之不見兮每撫卷而長歎幸斯文之未湮兮
有作者其猶可觀行四方而歷求兮嗟遇合之良難驅
余車於宛陵兮忝卑冗之微官際碩師之戾止兮挾文
采之鸛鸞仰門牆之咫尺兮從几杖之盤桓鼓經笥之
芳塵兮挹詞海之餘瀾誠內克以自慰兮忘栖栖之鮮
歡既往造夫承明之廬兮邈睇乎雲端忽幡然其來歸

兮踐良期於歲寒方金匱之紬書兮競羣英之彈冠邇
清光以奏伎兮銜奇賈於琅玕何翁季之齊志兮追嘯
歌於考槃蹇余抱此幽懷兮憎怫鬱乎肺肝望白雲之
悠悠兮昧飛雪之漫漫念不可以此留兮返余舍乎叢
蘭惜方密而遽暎兮尚勤勸夫加餐俗滔滔而日靡兮
慨脩名之孰完時動靜公則然兮夫豈非小子之所安
雖千里其匪遙兮炯相照於中丹

離人怨長夜賦

以別思方深寒
宵苦永為韻

唐

王 榮

離思難任長宵且深坐感夫君之別誰憐此夜之心念
雲雨以初分何時促膝俯衾裯而起怨幾度沾襟始其
歌罷東門袂揮南浦征車去兮塵漸遠匹馬歸兮情自
苦閒庭已暝對一點之凝釭別酒初醒聞滿簷之寒雨
且夕也悄悄何長悠悠未央向銀屏而寡趣撫角枕以
增傷蓋以緬行役兮路千里邈音塵兮天一方我展轉
以空牀固難成夢君盤桓於旅館豈易為腸由是觸目
生悲迴身弔影雲積陰而月暗鳥深棲而樹靜凝情漸

久訝古寺之鐘遲會面猶賒奈嚴城之漏永於時階滴
飄冷窻風送寒徒抱分襟之恨全忘秉燭之歡遠林而
未有烏啼偏嫌耿耿幽壁而徒聞蛩響頓覺漫漫嗟夫
昔每同袍今成兩地既覩物以遐想復支頤而不寐鄰
機尚織重增蘇氏之懷詞客猶吟更動江生之思况乎
燕宋程遠關山道遙怨復怨兮斯別長莫長乎此宵使
人玄髮潛變紅顏暗凋杳嚮晨而若歲嗟達旦以無聊
且夫名利猶存津梁未絕苟四方之志斯在則五夜之

情徒切然哉吾生既異於匏瓜又安得不傷乎離別

離居賦

元黃潛

慨予後古人而生兮恒潔志以好脩憑祖先之遺業兮
援往烈之餘休粵總角以授經兮歲行汨其已周獨貿
貿吾何故兮庶遠悔而為郵攬雋哲以我弼兮懿前志
之為謀非夫人之察予衷兮孰蹭蹬而見收胡閔勉抱
茲獨兮曠周旋於窮陬廓私處而莫伍兮愴增思以懷
愁昔回路之相贈兮竭所獲以交投卒並轡以疾驅兮

入聖域而彌優彼獨何人兮予顧忍恥而蒙羞惟昔者
之擇從兮極遠討而旁搜衆雜還其既多兮邈異趣之
交鈎紛詡詡以徵逐兮咸胥顧而勸憂曰予行之不可
兮矧將勗予以良猷居快悒其誰語兮弦予歌之幽幽
恫惚恍以顧懷兮耿孤倡而無酬哀下土之全濁兮駭
奔飛其呀咻大龜視予以吉卜兮曷去之而遐遊廣輪
曼曼而靡極兮忽又惑其所由非識路為之先道兮懼
九折之摧吾輶羌穴豫以狐疑兮悵臨歧而夷猶軫中


情之戀嫫兮思勃鬱而若抽噫遺行之已累兮固吾以
為贅疣弗瞑眩之是圖兮何厥疾之能瘳堅所秉猶未
怠兮悼年歲之易適諒予懷之既騁兮雖坎壈其敢偷
苟非予之所存兮夫又何求結煩言而招要兮遂失心
以綢繆夫有恃以為善兮詎無成而淹留

御定歷代賦彙外集卷八

謹案第十五頁後二行悅栩栩以一適兮刊本悅
訛脫據誠齋集改

第十六頁前五行謁帝久而乃覲兮刊本久訛失
據誠齋集改





總校官庶吉士臣張能照
校對官編修臣楊壽楠
謄錄監生臣阮坦

欽定四庫全書薈要

集部

御定歷代賦彙外集卷九

欽定四庫全書薈要卷一萬七千三百六十八

集部

御定歷代賦彙外集卷九

行旅

北征賦

漢班彪

離離兮北征
遭世之顛覆兮罹填塞之阨災
舊室滅以丘墟兮曾不得乎少留
遂奮袂以北征兮超絕迹而遠遊
朝發軔於長都兮夕宿瓠谷之玄宮
歷雲門而反顧望通天之崇崇
乘陵岡以登降息郇邠之邑鄉
慕公劉之遺德及

行葦之不傷彼何生之優渥我獨罹此百殃故時會之
變化兮非天命之靡常登赤須之長坂入義渠之舊城
忿戎王之淫狡穢宣后之失貞嘉秦昭之討賊赫斯怒
以北征紛吾去此舊都兮騑遲遲以厯茲遂舒節以遠
逝指安定以為期涉長路之緜緜兮遠紆迴以樛流過
泥陽而太息悲祖廟之不修釋余馬於彭陽兮且弭節
而自思日晡晡其將暮兮覩牛羊之下來寤怨曠之傷
情兮哀詩人之歎時越安定以容與兮遵長城之漫漫

劇蒙公之疲民兮為彊秦乎築怨舍高亥之切憂兮事
蠻狄之遼患不耀德以綏遠兮顧厚固而繕藩首身分
而不寤兮猶數功而辭讐何夫子之妄說兮孰云地脈
而生殘登障隧而遙望兮聊須臾以婆娑閔獯鬻之猾
夏兮弔尉卽於朝那從聖文之克讓兮不勞師而幣加
惠父兄於南越兮黜帝號於尉陀降几杖於藩國兮折
吳淠之逆邪惟太宗之蕩蕩兮豈曩秦之所圖齊高平
而周覽兮望山谷之嵯峨野蕭條以莽蕩迴千里而無

家風焱發以飄飄兮谷水淮以揚波飛雲霧之杳杳涉
積雪之皚皚鴈邕邕以羣翔兮鷓鴣鳴以濟濟遊子悲
其故鄉兮心愴悵以傷懷撫長劒而慨息兮泣連落而
霑衣攬余涕以於邑兮哀生民之多故夫何陰曠之不
陽兮嗟久失其平度諒時運之所為兮永伊鬱其誰愬
亂曰夫子固窮遊藝文兮樂以忘憂惟聖賢兮達人從
事有儀則兮行止屈申與時息兮君子履信無不居兮
雖之蠻貊何憂懼兮

東征賦

漢
曹大家

惟永初之有七兮余隨子兮東征時孟春之吉日兮撰
良辰而將行乃舉趾而升輿兮夕余宿乎偃師遂去故
而就新兮志愴恨而懷悲明發曙而不寐兮心遲遲而
有違酌樽酒以弛念兮喟抑情而自非諒不登巢而琢
蠡兮得不陳力而相追且從衆而就列兮聽天命之所
歸遵通衢之大道兮求捷徑欲從誰乃遂往而徂逝兮
聊遊目而遨魂歷七邑而觀覽兮遭玃革縣之多艱望河

洛之交流兮看成皋之旋門既免脫於峻嶮兮厯滎陽
而過武卷食原武以息足宿陽武之桑間涉封丘而踐
路慕京師而竊歎小人性之懷土兮自書傳而有焉遂
進道而少前兮得平丘之北邊入匡郭而追遠兮念夫
子之厄勤彼衰亂之無道兮乃困畏乎聖人悵容與而
久駐兮忘日夕而將昏到長垣之境界察農野之居民
睹蒲城之丘墟兮生荆棘之榛榛惕覺悟而顧問兮想
子路之威神衛人嘉其勇義兮迄於今而稱云蘧氏在

城之東南兮民亦尚其丘墳唯令德為不朽兮身既歿
而名存惟經典之所美兮貴道德與仁賢吳札稱多君
子兮其言信而有徵後衰微而遭患兮遂陵遲而不興
知性命之在天由力行而近仁勉仰高而蹈景盡忠恕
而與人好正直而不回兮精誠通於明神庶靈祇之鑒
照兮祐貞良而輔信亂曰君子之思必成文兮盍各言
志慕古人兮先君行止則有作兮雖其不敏敢不法兮
貴賤貧富不可求兮正身履道以俟時兮修短之運愚

智同兮靖恭委命唯吉凶兮敬慎無怠思謙約兮清靜
少欲師公綽兮

東征賦

晉
袁宏

惟吾生於末運託一葉於鄧林顧微軀之眇眇若絕響
之遺音壯公瑾之明達吐不世之奇策挫百勝於崇朝
靡雲旗於赤壁三光一舉而參分四海指麾而中隔過
武昌以逍遙登樊山以流眄訪遺老以證往乃西鄂之
舊縣曩有吳之初基升員丘而豹變爾乃出桑洛會通

川背彭澤面長泉洲渚迢遞巖岫虛懸即雲似嶺望水
若天日月出乎波中雲霓生於浪間嗟我行之彌留跨
晦朔之倏忽風褰林而蕭瑟雲出山而蓬勃向孫氏之
南面鑽靈龜以相土模鄴鎬之制度寫河洛之規矩經
始郭郭築室葺宇金城萬雉崇墉百堵君臣有章上下
獲叙所以能三分天下而有其文武到吳都以停舟覽
闔閭之餘塵建修城以營郭引通流而發津遠矣吳德
舊邦維新太伯被髮仲雍文身言偃以文學遺風季札

以讓國稱仁高節顯於華夏端委行乎海濱

東征賦

唐高適

歲在甲申秋窮季月高子遊梁復久方適楚以超忽望
君門之悠哉微先容以効拙始不隱而不仕宜漂淪而
播越出東苑而遂行沿濁河而茲始感隋皇之敗德劃
平原而為此西馳洛汭東並淮涑地豁山開川流波委
六宮景從千官邈迤龍舟錦帆照耀乎數千里大駕將
去羣盜日起尸位者卷舌而偷生直諫者解頤而後死

寄腹心於梟獍任手足於蛇虺終受殺於匹夫尚興疑
於愛子豈不為窮力役於征戰務淫逸於奢侈六軍悲
牧野之師萬姓哭遼陽之鬼嗟顛覆於瞬目指年代於
流水唯見長亭之煙火悲曠野之荆杞至鄴縣之舊邑
懷蕭相之高風既屈節於主吏每歸誠於沛公始俱起
於天下乃從定於關中推金帛於他人抱圖籍於我躬
按山川之險阻救天地於屯蒙嘉盈俸以增邑方指蹤
而建功納邵平以防患舉曹參而告終經絰城而永望

想譙郡而銷憂慨魏武之雄圖終大濟以橫流用兵戈
以威四海挾天子而令諸侯乃擅命以誅伏徒矯跡以
安劉吾始未知夫逆順胡寧比於殷周下符離之西偏
臨彭城之高岸連山鬱而潏蕩分大澤乎渺漫憶昔天
未厭禍項氏叛換解齊歸楚自蕭擊漢天地無色風塵
潰亂憫君王之坎軻混士卒以奔散苟炎運之克昌豈
人生之塗炭次靈璧之逆旅面垓下之遺墟嗟魯公之
慷慨聞楚聲之悵於歌拔山之涕洟竊霸圖而莫居捐

亞父之何甚悲虞姬之有餘出重圍而狼狽至陰陵以
躊躇顧天亡以自負雖身死兮焉如登夏丘而寓目對
蒲隧而愁予聞取慮之斯在徵長直而舍諸宿徐縣之
迴津惟偃王之舊域方以小而事大豈無位而有德彼
皆昏暴以喪邦伊何仁義而亡國高延陵之挂劍慕班
彪之述職涵沛水之悠悠俯婁林之行直即日河許依
然泗上山川土田耳目清曠眺睢源之呀豁倚楚關之
雄壯挂輕席於中流順長風以破浪過盱眙之邑屋傷

義帝之波蕩雖三戶之亡秦知萬人以離項越龜山而
訪泊入漁浦而待潮鴻鴈飛兮木葉下楚歌悲兮雨瀟
瀟霜封野樹冰凍寒苗岸草無色蘆花自飄幸息肩於
人事願投跡於漁樵思魏闕而天遠向秦川而路遙侯
鳴雞以進帆趨亂流以爭迅縱孤舟於浩大撫垂堂以
誠慎遵往主於淮陰徵昔賢於韓信哀王孫以寄食嘉
漂母之無愠鄙亭長之不仁乃晨炊而嗇恡忽從龍以
獲騁遂擒豹以自奮破金趙而用奇稱假齊以益振幸

辭通以感惠俄結旆而謀釁當處約而心亨曷持盈而
不順陵赤岸之迢遰棹白波之紆餘厯山陽之村野投
襄賁之邑居人多耆艾俗喜觀魚連葭葦於郊甸雜汀
洲於里閭感百川之朝宗彌結念於歸歟日杲杲以麗
天雲飄飄以卷舒魯放情而蹈海丘永歎於乘桴遇坎
則止吾今不知其所如哉

西征賦

晉
潘岳

歲次玄枵月旅蕤賓丙丁統日乙未御辰潘子憑軾西

征自京徂秦迺喟然而歎曰古往今來邈矣悠哉寥廓
忽恍化一氣而甄三才此三才者天地人道唯生與位
謂之大寶生有修短之命位有通塞之遇鬼神莫之要
聖智弗能豫當休明之盛世兮託菲薄之陋質納旌弓
於鉉台讚庶績於帝室嗟鄙夫之常累固既得而患失
無柳季之直道佐士師而一黜武皇忽其升遐八音遏
於四海天子寢於諒闇兮百官聽於冢宰彼負荷之殊
重兮雖伊周其猶殆窺七貴於漢庭疇一姓之或在無

危明以安位祗居逼以示專陷亂逆以受戮匪降禍之
自天孔隨時以行藏遽與國而舒卷苟蔽微以繆章患
過辟之未遠悟山潛之逸士卓長往而不反陋吾人之
拘攣飄萍浮而蓬轉察位偶其隆替名節淮以隳落危
素卵之累殼甚玄燕之巢幕心戰懼以兢悚如臨深而
履薄夕獲歸於都外宵未中而難作匪擇木以棲集斲
林焚而鳥存遭千載之嘉會皇合德於乾坤弛秋霜之
嚴威流春澤之渥恩甄大義以明責反初服於私門皇

鑒揆余之忠誠俄命余以末班牧疲人於西夏攜老幼而入關丘去魯而顧歎季過沛而涕零伊故鄉之可懷
疚聖達之幽情矧匹夫之安土邈投身於鎬京猶犬馬
之戀主竊託慕於闕庭眷輦洛而掩涕思纏緜於墳塋
爾乃越平樂過街郵秣馬皋門稅駕西周遠矣姬德興
自高辛思文后稷厥初生民率西水滸化流岐豳祚隆
昌發舊邦惟新旋牧野而歷茲愈守柔以執競夜申旦
而不寐憂天保之未定惟泰山其猶危祀八百而餘慶

鑒亡王之驕淫竄南巢以投命坐積薪以待然方指日
而比盛人度量之乖舛何相越之遼迴考土中於斯邑
成建都而營築既定鼎於郊廓遂鑽龜而啓繇平失道
而來遷繫二國而是祐豈時王之無僻賴先哲以長懋
望圉北之兩門感號鄭之納惠討子頽之樂禍尤闕西
之效戾重戮帶以定襄弘大順以霸世靈壅川以止鬪
晉演義以獻說咨景悼以迄丐政凌遲而彌季俾庶朝
之構逆歷兩王而干位踰十葉以逮赧邦分崩而為二

竟橫噬於虎口輸文武之神器漂孝水而濯纓嘉善名
而在茲天赤子於新安坎路側而瘞之亭有千秋之號
子無七旬之期雖勉勵於延吳實潛慟乎余慈眄山川
以懷古悵攬轡於中途虐項氏之肆暴坑降卒之無辜
激秦人以歸德成劉后之來蘇事洄洑而好還卒宗滅
而身屠經澠池而長想停余車而不進秦虎狼之強國
趙侵弱之餘燼超入險而高會仗命世之英蘭恥東瑟
之偏鼓提西缶而接刃辱十城之虛壽奄咸陽以取雋

出申威於河外何猛氣之咆勃入屈節於廉公若四體
之無骨處智勇之淵偉方鄙吝之忿悁雖改日而易歲
無等級以寄言當光武之蒙塵致王誅於赤眉異奉辭
以伐罪初垂翅於迴谿不尤眚以掩德終奮翼而高揮
建佐命之元勳振皇綱而更維登峻坂之威夷仰崇嶺
之嵯峨皋託墳於南陵文違風於北阿蹇哭孟以審敗
襄黑纛而授戈曾隻輪之不返縹三帥以濟河值庸主
之矜懷殆肆叔於朝市任好綽其餘裕獨引過以歸已

明三敗而不黜卒陵晉以雪恥豈虛名之可立良致霸
其有以降曲峻而憐號託與國於亡虞貪誘賂以賣鄰
不及臘而就拘垂棘反於故府屈產服於晉輿德不建
而民無援仲雍之祀忽諸我徂安陽言陟陝郭行乎漫
瀆之口憇乎曹陽之墟美哉邈乎茲土之舊也固乃周
召之所分二南之所交麟趾信於闕雎騶虞應乎鵲巢
愍漢氏之剥亂朝流亡以離析卓滔天以大滌劫宮廟
而遷迹俾萬乘之盛尊降遙思於征役顧請旋於催汜

既獲許而中惕追皇駕而驟戰望玉輅而縱鎬痛百寮
之勤王咸畢力以致死分身首於鋒刃洞胷腋以流矢
有褰裳以投岸或攘袂以赴水傷桴楫之褊小撮舟中
之掬指升曲沃而惆悵惜兆亂而兄替枝末大而本披
都偶國而禍結臧札飄其高厲委曹吳而成節何莊武
之無恥徒利開而義閉躡函谷之重阻看天險之衿帶
跡諸侯之勇怯算嬴氏之利害或開關以延敵競遁逃
以奔竄有噤門而莫啓不窺兵於山外連雞互而不栖

小國合而成大豈地勢之安危信人事之否泰漢六葉而拓畿縣弘農而遠關厭紫極之閑敞甘微行以遊盤長傲賓於柏谷妻觀貌而獻餐疇匹婦其已泰胡厥夫之謬官昔明王之巡幸固清道而後往懼銜縻之或變峻徒御以誅賞彼白龍之魚服挂豫且之密網輕帝重於天下奚斯漸之可長弔戾園於湖邑諒遭世之巫蠱探隱伏於難明委讒賊之趙虜加顯戮於儲貳絕肌膚而不顧作歸來之悲臺徒望思其何補紛吾既邁此全

節兮又繼之以盤桓問休牛之故林感徵名於桃園發
閔鄉而警策遡黃卷以濟潼眺華岳之陰崖覲高掌之
遺蹤憶江使之反壁告亡期於祖龍不語怪以徵異我
聞之於孔公愠韓馬之大憝阻關谷以稱亂魏武赫以
霆震奉義辭以伐叛彼雖衆其焉用故制勝於廟算殛
揚桴以振塵繡瓦解而冰泮超遂遁而奔狄甲卒化為
京觀倦狹路之迫隘軌崎嶇以低仰蹈秦郊而始闢豁
爽塏以宏壯黃壤千里沃野彌望華實紛敷桑麻條暢

邪界褒斜右濱沂隴寶雞前鳴甘泉後湧面終南而背
雲陽跨平原而連嶓冢九峻截薛太一龍從吐清風之
颼戾納歸雲之鬱蒼南有玄灞素滻湯井溫谷北有清
渭濁涇蘭池周曲浸決鄭白之渠漕引淮海之粟林茂
有鄠之竹山挺藍田之玉班述陸海珍藏張叙神皋隩
區此西賓所以言於東主安處所以聽於憑虛也可不
謂然乎勁松彰於歲寒貞臣見於國危入鄭都而抵掌
義桓友之忠規竭股肱於昏主赴塗炭而不移世善職

於司徒緇衣弊而改為履犬戎之侵地疾幽后之詭惑
舉偽烽以沮衆淫嬖褒以縱慝軍敗戲水之上身死驪
山之北赫赫宗周滅為亡國又有繼於此者異哉秦始
皇之為君也傾天下以厚葬自開闢而未聞匠人勞而
弗圖俾生理以報勤外罹西楚之禍內受牧豎之焚語
曰行無禮必自及此非其效歟乾坤以有親可久君子
以厚德載物觀夫漢高之興也非徒聰明神武豁達大
度而已也乃實慎終追舊篤誠款愛澤靡不漸恩無不

逮率土且猶弗遺而況於鄰里乎而況於卿士乎於斯時也乃摹寫舊豐制造新邑故社易置枌榆遷立街衢如一庭宇相襲渾雞犬以亂放各識家而競入籍含怒於鴻門沛跼蹐而來王范謀害而不許陰授劔以約莊搆白刃以萬舞危冬葉之待霜履虎尾而不噬寔要伯于子房樊抗憤以卮酒咀彘肩以激揚忽蛇變而龍攄雄霸上而高驤增遷怒而橫撞碎玉斗其何傷嬰胷組於軹塗投素車而肉袒踈飲餞於東都畏極位之盛滿

金墉鬱其萬雉峻嶒峭以繩直戾飲馬之陽橋踐宣平
之清閼都中雜還戶千人億華夷士女駢闐逼側展名
京之初儀即新館而莅職勸疲鈍以臨朝勗自強而不
怠於是孟秋爰謝聽覽餘日巡省農功周行廬室街里
蕭條邑居散逸營宇寺署肆廛管庫叢芮於城隅者百
不處一所謂尚冠修成黃棘宣明建陽昌陰北煥南平
皆夷漫滌蕩亡其處而有其名爾乃階長樂登未央汎
太液凌建章縈馭娑而款駘盪輶朽詣而轢承光徘徊

桂宮惆悵栢梁驚雉雉於臺陂狐兔窟於殿傍何黍苗
之離離而余思之芒芒洪鐘頓於毀廟乘風廢而弗縣
禁省鞠為茂草金狄遷於霸川懷夫蕭曹魏邴之相辛
李衛霍之將銜使則蘇屬國震遠則張博望教敷而彝
倫叙兵舉而皇威暢臨危而智勇奮投命而高節亮暨
乎祗侯之忠孝淳深陸賈之優游宴喜長卿淵雲之文
子長政駿之史趙張三王之尹京定國釋之之聽理汲
長孺之正直鄭當時之推士終童山東之英妙賈生洛

陽之才子飛翠綏拖鳴玉以出入禁門者衆矣或被髮
左衽奮迅泥滓或從容博會望表知裏或著顯績而嬰
時戮或有大才而無貴仕皆揚清風於上烈垂令聞而
不已想珮聲之遺響若鏗鏘之在耳當音鳳恭顯之任
勢也乃熏灼四方震耀都鄙而死之日曾不得與夫十
餘公之徒隸齒名才難不其然乎望漸臺而扼腕梟巨
猾而餘怒揖不疑於北闕軼檣里於武庫酒池鑒於商
辛追覆車而不寤曲陽僭於白虎化奢淫而無度命有

始而必終孰長生而久視武雄畧其焉在近惑文成而
溺五利侔造化以制作窮山海之奧秘靈若翔於神島
奔鯨浪而失水曝鱗骼於漫沙隕明月以雙墜擢仙掌
以承露干雲漢而上至致叩鉤其奚難惟余欲而是恣
縱逸遊於角觝絡甲乙以珠翠忍生民之減半勒東岳
以虛美超長懷以遐念若循環之無賜較面朝之煥炳
次後庭之猗靡壯當熊之忠勇深辭輦之明智衛鬢髮
以光鑒趙輕體之纖麗咸善立而聲流亦寵極而禍侈

津便門以右轉究吾境之所暨掩細柳而撫劒快孝文
之命帥周受命以忘身明戎政之果毅距華蓋於壘和
案乘輿之尊轡肅天威之臨顏率軍禮以長擅輕棘霸
之兒戲重條侯之倨貴索杜郵其焉在云孝里之前號
惆輟駕而容與哀武安以興悼爭伐趙以徇國定廟算
之勝負扞矢言而不納反推怨以歸咎未十里於遷路
尋賜劒以刎首嗟主闇而臣嫉禍於何而不有窺秦墟
於渭城冀闕緬其堙盡覓陞殿之餘基裁峻屹以隱嶙

想趙使之抱壁劉晚楹以忼憤燕圖窮而荆發紛絕袖
而自引筑聲厲而高奮狙潛鉉以脫臙據天位其若茲
亦狼狽而可愍簡良人以自輔謂斯忠而鞅賢寄苛制
於捐灰矯扶蘇於朔邊儒林填於坑穽詩書煬而為煙
國滅亡以斷後身刑輶以啓先商法焉得以宿黃犬何
可復牽野蒲變成脯苑鹿化以為馬假讒逆以天權
鉗衆口而寄坐兵在頸而顧問何不早而告我願黔黎
其誰聽惟請死而獲可逮子嬰之果決敢討賊以紓禍

勢土崩而莫振作降王於路左蕭收圖以相劉料險易
與衆寡羽天與而弗取冠沐猴而縱火貫三光而洞九
泉曾未足以喻其高下也感市閭之敢井歎尸韓之舊
處承屬號而守闕人百身以納贖豈生命之易投誠惠
愛之洽著訐望之以求直亦余心之所惡思夫人之政
術實幹時之良具苟明法以釋憾不愛才以成務弘大
體以高貴非所望於蕭傳造長山而慷慨偉龍顏之英
主胷中豁其洞開羣善湊而必舉存威格乎天區亡墳

掘而莫禦臨掩坎而累朴步毀垣以延佇越安陵而無
譏諒惠聲之寂寞弔袁絲之正議伏梁劒於東郭訃景
皇於陽丘奚信譖而矜謔殞吳嗣於局下蓋發怒於一
博成七國之稱亂翻助逆以誅錯恨過聽而無討茲沮
善而勸惡咎孝元於渭塋執奄尹以明貶褒夫君之善
行廢園邑以崇儉過延門而責成忠何辜而為戮陷社
稷之王章俾幽死而莫鞠忤淫嬖之凶忍勦皇統之孕
育張舅氏之奸漸貽漢宗以傾覆刺哀主於義域僭天

爵於高安欲法堯而承禪永終古而不刊瞰康園之孤
墳悲平后之專絜殃厥父之篡逆蒙漢恥而不雪激義
誠而引決赴丹燭以明節投宮火而焦糜從灰燼而俱
滅驚橫橋而旋軫歷敝邑之南垂門磁石而梁木蘭兮
構阿房之屈竒疏南山以表闕倬樊川以激池役鬼傭
其猶否矧人力之所為工徒斲而未息義兵紛以交馳
宗祧汙而為沼豈斯宇之獨隳由偽新之九廟誇宗虞
而祖黃驅吁嗟而妖臨搜佞哀以拜郎誦六藝以飾姦

焚詩書而面牆心不則於德義雖異術而同亡宗孝宣
於樂遊紹衰緒以中興不獲事於敬養盡加隆於園陵
兆惟奉明邑號千人訊諸故老造自帝詢隱王母之非
命縱聲樂以娛神雖靡率於舊典亦觀過而知仁憑高
望之陽隈體川陸之污隆開襟乎清暑之館遊目乎五
柞之宮交渠引漕激湍生風乃有昆明池乎其中其池
則湯湯汗汗滉漾彌漫浩如河漢日月麗天出入乎東
西旦似暘谷夕類虞淵昔豫章之名字披玄流而特起

儀景星於天漢列牛女以雙峙圖萬載而不傾奄摧落
於十紀擢百尋之層觀今數仞之餘址振鷺于飛鳧躍
鴻漸乘雲頡頏隨流澹澹潏潏驚波唼唼陵苒華蓮爛
於綠沼青蕃蔚乎翠湫伊茲池之肇穿肄水戰於荒服
志勤遠以極武良無要於後福而菜蔬芻實水物惟錯
乃有贍乎原陸在皇代而物土故毀之而又復凡厥寮
司既富而教咸帥貧情同整楫擢收畧課獲引繳舉效
鰥夫有室愁民以樂徒觀其鼓柁迴輪灑鈎投網垂餌

出入挺义來往纖經連白鳴榔厲響貫鯢鰓尾制三牽
兩於是弛青鯤於網鉅解賴鯉於黏徽華魴躍鱗素鱖
揚鬐饕餮人縷切鸞刀若飛應刃落俎霍霍霏霏紅鮮紛
其初載賓旅竦而遲御既餐服以屬厭泊恬靜以無欲
迴小人之腹為君子之慮爾乃端策拂茵彈冠振衣徘徊
迴艷鎬如渴如飢心翹慙以仰止不加敬而自祇豈三
聖之敢夢竊十亂之或希經始靈臺成之不日惟艷及
鎬仍京其室庶人子來神降之吉積德延祚莫貳其一

永惟此邦云誰之識越可略聞而難臻其極子贏鋤以
借父訓秦法而著色耕讓畔以閒田沾姬化而生棘蘇
張喜而詐騁虞芮愧而訟息由此觀之士無常俗而教
有定式上之遷下猶鈞之埏埴雖五方雜會風流溷淆
惰農好利不昏作勞密邇獫狁戎馬生郊而制者必割
實存操刀人之升降隨政隆替仗信則莫不用情無欲
則賞之不竊雖智不能理明不能察信此心也庶免夫
戾如其禮樂以俟來哲

南征賦

梁張纘

歲次娵觜月惟中呂余謁帝於承明將述職於南楚忽
中川而反顧懷舊鄉而延佇沂金牛之迅渚覩靈濤之
雄壯標素嶺乎青壁聳潁文於翠嶂跳巨石以驚湍批
衝巖而駭浪鏟千尋之峭峰深萬仞之大壑隱日月以
蔽虧搏風煙而迴薄崖映川而晃朗水騰波以倏爍下
流湍而洄險上岑崟而將落於是近睇赭峰遥瞻鵲岸
島嶼蒼茫風霜蕭散值時雨之新晴觀百川之浩汙水

泓澄以閣夕山參差而辨旦忽臨睨於故鄉渺江天其
無畔獨向風而舒情褰芳洲而誰翫於是千流共歸萬
嶺分狀清江洗滌平湖夷暢翻光轉彩出沒遙漾岷山
嶓冢悠遠寂寥清湓赤岸控汐引潮界飛流於翠薄耿
長虹於青霄若夫灌莽川涯曾潭水府游泳之所往還
喧鳴之所攢聚聆寡鶴之偏叫聞孤鴻之慕侶在客行
而多思獨傷魂而悽楚

南征賦

宋
張耒

余文窮而莫諱兮顧四方其何適毋寧征於江左兮毛
土膏其可食抱朝暮之勝氣兮西山吾以為宅風余帆
乎晝日兮余朝發於赤壁標玉壘之下流兮逝蓬飛於
一息迅沮漳而橫入兮匯揚瀾於左蠡寧吾自無恨兮
濤猛獸以噬寧霽光風於木末兮俟餞彼猶未肯平迷
失道而問津兮御於朱明就漁父而陳詞兮余非湘纍
之獨醒父告余以不治兮南樵舍而自成破隴畝而溢
流兮石險狠而當道豈舟人之肅洽兮艇觸撥而欹倒

繫余車於桑木兮猶可以徒行夷余竈使不得燔兮余
猶可以乞鄰四厚土之瀰漫兮余騷騷無以為家雖斯
懷之可人兮烏猶長鳴而歎嗟黃蒲田之所播植兮歲
有秋而登場既狼戾而竭鄰兮已獨賦乎廩食饌上方
之玉盤兮上曰飽斯人之德歲協洽而蘄兮味柔嘉余
未得食染余指於鼎兮豈不同此臭味使持節於十郡
兮民得此父母顧余懷之倉卒兮謂一寒之何故雖解
衣推食兮曰此小惠汝弗德我我世之良醫兮藥神膏

而可以破汝腹賦余九言而九頓首兮度百世而用足
閱一世之風波兮曰餘皇吾以為歸宿

南征賦

宋唐庚

始攝提之孟冬余負罪而南馳雪盈尺而更繁風三日
而猶吹體凍極而若無心怖甚而忘悲凡再信而至許
覺驚魂之稍歸訪景福之遺基指空郊之荒澤曾禾黍
之無有矧樂梁之丹雘國已挹於三馬臣不聞於一鶚
豈當世之無儒抑此病之難藥道昆陽而流歎澹悲風

與愁雲階一夫之僭竊紛萬鬼之煩冤嗟世祖之論功
忘王章之曩言既直鉤之不食終曲突之無恩過叔子
之舊邦登峴山而痛哭方闕右之放賈蓋眼中之拔鋸
獨何心而表留卒養癰而潰肉儻遺靈之猶在當舉白
而相沃盡荆門之犖确瞰蜀江之湯湯念故人之久別
覺良晤之甘香稍回翔於澧浦忽凌亂於瀟湘時廓舒
而浩蕩復收斂而淒涼味九歌之餘哀閔三閭之孤趣
豈公子之足怨實舉國而無與內不懌於女嬃外見非

於漁父持此道以奚歸亦各安於所處自是遠矣行人
漸稀水愈激而愈清山益削而益竒造郴嶺之窮處去
湟關之故基客至此兮返顧鴈至此兮北飛眷武溪之
毒淫弔文淵之矍鑠射參狼於隴阪觀跼鳶於浪泊奮
身出於萬死騰口喧於百惡信老子之足哀覺少游之
差樂經韶陽而再宿寫石上之遺聲悟聖神之在宥如
天地之生成彼禽魚固自有理而日月未嘗不明雖吹
萬之不同吾得一而皆正舍真陽之短策放清遠之孤

舟覩碧落之靈秘
嘲峽山之媚柔
承懸崖之滴乳
塞泉羅之垂膠
探羊城於浩茫
發蒲澗於深幽
窮一時之詭觀
渺萬古之清愁
蓋明年之正月矣
始稅駕於羅浮

南征賦

有序

宋李綱

仲輔賦西郊見寄次韻作南征賦報之

承嘉惠以南征兮動去國之離愁
遠故園而回首兮驚歲華之再秋
覽廬阜之環秀兮俯大江之東流
登黃鶴而遐矚兮發孤照之寸眸
吞雲夢於胸中兮懷浙河於

醉裏悵離羣而索居兮寄相思於一水佩蘭芷之芬芳
兮狎樵漁於汝爾終繫羈而未釋兮類斃者之念起荷
天恩之寬大兮猶坐縻於廩食馳精爽於淮濱兮飛夢
魂於漠北悵曷日而歸休兮遂東山之釣弋老冉冉而
將至今豈佳時之再得嘗承教於君子兮竊希風於古
人慨撫卷而擊節兮如意氣之相親每終篇而自喜兮
覺詩成之有神惟深藏而密寄兮懼夫妒者之嗔顧戎
馬之崩騰兮方四郊之多事臨洞庭而傷懷兮望九疑

而增思亂湘流而適澧兮靈均豈其前身續離騷而賦
遠遊兮願承芳於後塵與日月而爭光兮庶此道之彌
新

南征賦

宋 邢居實

嗟余生之賤兮常坎壈而多憂汨東西與南北兮無猷
畝以歸休皇六世之十祀兮竭來賓夫京師奉晨昏於
庭闈兮忽十年其於茲哀衆人之夢夢兮乘巖危以射
利驚精神於末流兮固廉士之所恥慕前哲之高蹈兮

臨川流而盥耳懼離羣之孤陋兮將遠舉而復已彼世
論之糾纏兮謂白圭為多疵何我公之潔清兮亦見尤
於盛時皇命之不可淹兮方仲春而戒行惟甲子之良
辰侍安輿而南征昔仲尼之去魯車遲遲以淹留此雖
非吾之舊邦兮猶慘慘而懷憂賓朋肅駕而來餞兮班
豆觴於水渚執余手以踟躕兮不覺涕下而霑衣輶軋
軋而不能前兮馬蕭蕭而反顧念長路之超遠兮恐白
日之云暮敕僕夫使整駕兮遂奮袂而辭去將發軔而

回首兮望國門之穹崇惟小人之眷戀兮情鬱結乎予
衷經土山之盤紆兮入空谷之豁鴻野曠蕩而無垠兮
榛林蕭條而來風鹿呦呦以鳴羣兮鳥嚶嚶而求友悵
遑遑於中野兮徒惛悒其誰咎晨脂車於諸阡兮夕稅
駕於尉氏登高丘以長嘯兮聲慷慨而凌厲想阮氏之
風流兮停予車於山椒斯人不可得而見兮寄陳迹於
蓬蒿時荏苒其不淹兮春草生兮青青羣雄挾雌以高
飛兮倉鷄得意而和鳴麥漸漸以被隴兮遵微行而徂

征欲淹留以容與兮心搖搖而靡寧平原塊莽以阨靡
兮迴極目乎百里獨煢煢以遠遊兮曾不得而少止歷
釣臺之故丘兮涉潁水之溱溱望周襄之蕪城兮弔封
人之圯墳魂飛揚而不反兮墓蕪穢而不治曾不得其
死所兮豈純孝之可恃蹇遭回於水濱兮日晡晡其黃
昏問捷徑於野人兮釋予馬於汝墳申旦展轉而不能
寐兮起視夜之何其僕夫告余以肅駕兮指明星而載
馳羣山歲崦而造天兮踐羊氏之北境企予足以長望

兮南路眇其方永經昆陽之遺墟兮聊裴回而逡巡高
城曲岬而特起兮雉堞隱嶙而猶存狐貉穴處於其下
兮鼯鼯吟嘯而成羣蒿艾翁蔓以相依兮枳棘鬱其榛
榛悼漢氏之絕滅兮想世祖之中興方巨猾之滔天兮
恣豺狼之噬吞肆橫行於天下兮驅虎豹以為羣伏大
義而奮討兮實南土之裔孫運欃槍而一掃兮忽電滅
而無存彼百萬之貔貅兮曾一旅之莫抗信天道之輔
順兮豈人謀之不臧迄於今幾千祀兮魂魄遊乎何鄉

冀髮髯其神靈兮步徙倚而彷徨過宛葉而弭節兮陟
方城之戕戕歎羈旅之無友兮彈劒缺而浩歌覽陵阜
之參差兮實鬻熊之舊疆不脩德而恃險兮曾幾何而
不亡宿上唐之候館兮聽晨雞之悲鳴濯余纓於泌水
兮瞻桐柏之嵒嵒飄風嫖怒以來東兮薄寒慘淒而中
人雲漫漫以承空兮霰雪下而繽紛念往人之阻脩兮
歎行役之多艱車陷淖而不進兮馬頓轡而盤跚僕夫
憔悴以懷歸兮憇章陵而南邁奠濁醪於漢祠兮顧白

水之如帶真人一去而不返兮佳氣蔥鬱而如在厯崎
嶇之九邑兮涉川路之千里心澹澹而忘食兮筋骨疲
乎鞭箠唯君子之無累兮雖九夷其可居矧神農之所
宅兮土深厚而無虞誦孔氏之法言兮疾沒世而無名
就寂寞以閑處兮非余心之所憑植木蘭以為籬兮塗
申椒以為堂蕙披靡而盛茂兮衆香郁其芬芳優游偃
息靜以索志兮又何必歸夫故鄉

南征賦

有序

明
陸深

空同子陽明子同日去國作南征賦

亶肅肅以宵征兮悲往路之未央懼中道之折軸兮思
改轍又惡夫無良顧僕夫以先後兮喟河廣之誰航瞻
桑梓之翳翳兮孰云忍捐夫故鄉方青春之駘蕩兮何
雨雪之縱橫白日匿其耿光兮鬱浮雲以翻揚睇山川
以無極兮陵谷杳乎其孰明祥狐嗥而風厲兮何有於
噦噦之鳳凰昔宣尼之遑遑兮固蒙笑於楚狂展直躬
以事人兮卒三黜乎舊邦慨殷室之多賢兮王子剖而

信芳苟璞玉之終在兮雖屢刖又何傷謀人之國兮焉
有禍而彌藏覩巨盜之乘垣兮固將揭之以峻防謂余
夢寐之顛倒兮豈敢幸其必當黑白之同體兮蓋昔焉
之所常憚嬋娟之翹妒兮吾安忍利夫清揚集絺綌以
禦冬兮疇駕尤於寒涼狎逆鱗而批之固以不碎為慶
也斥虎之使逝兮遭反噬未為殃也卽衷之洵安兮初
未量乎得喪曩委羽於東海兮奚成功之可望矢貞心
之不泯兮瀕九死吾猶恆昔淑媛之見背兮竟結髮之

難忘悵恩情之中絕兮往將灑埽乎室堂彼良農之俶
載兮力刈乎莠與稂誕嘉穀之離離兮竟收功於千倉
度中流以失楫兮豈俟共載而劬勩燕雀安於焚棟兮
斯物知之不長服先哲之明訓兮希旁燭之煌煌神龍
之淵天兮諒所乘之允臧步中夜以顧瞻兮睨牽牛與
七襄永相望於咫尺兮庶精誠之可將仰天閭之九重
兮冀羲馭之回光魂怳怳以上征兮蹇徘徊而彷徨亂
曰桂車蘭軒服騏驎兮登高臨深送征人兮懷芳握馨

遺心親兮瞻望弗及涕泗零兮

序征賦

魏徐幹

余因茲以從邁兮聊暢目乎所經觀庶士之繆殊察風
流之濁清沿江浦以左轉涉雲夢之無陂從青冥以極
望上連薄乎天維刊梗林以廣塗填沮洳以高蹊攀循
環其萬般亘千里之長湄行兼時而易節迄玄氣之消
微道蒼神之受謝逼鶉鳥之將棲慮前事之既終亦何
為乎久稽乃振旅以復蹤泝朔風而北歸及中區以釋

勤超栖遲而無依

撰征賦

有序

宋謝靈運

蓋聞昏明殊位貞晦異道雖景度回革亂多治寡是故
升平難於恒運剝喪易以橫流皇晉受命河汾來遷吳
楚數厯九世年踰十紀西秦無一援之望東周有三辱
之憤可為積禍纏繫固以久矣況乃陵塋幽翳情敬莫
遂日月推薄帝心彌遠慶靈將升時來不爽相國宋公
得一居貞回乾運軸內匡衮表外清遐陬每以區宇未

統側席盈慮值天祚攸興昧弱授機龜筮元謀符瑞景
徵於是仰祗俯協順天從兆興止戈之師躬暫勞之討
以義熙十有二年五月丁酉敬戒九伐申命六軍治兵
於京畿次師於汭上雲檣千艘雷輜萬乘羽騎盈塗飛
旂蔽日別命羣帥誨謨惠策法奇於三略義祕於六韜
所以鉤棘未曜殞前禽於金墉威弧始設走鉞隼於滑
臺曾不踰月二方獻捷宏功懋德獨絕古今天子感東
山之劬勞慶格天之光大明發興於鑒寐使臣遵於原

隰余攝官承乏謬克殊役皇華愧於先雅靡監賴於征
人以仲冬就行分春反命塗經九守路踰千里沿江亂
淮溯溥泗返詳觀城邑周覽丘墳眷言古迹其懷已多
昔皇祖作藩受命淮徐道固苞桑勲由仁積年月多歷
市朝已改永為洪業纏懷清厯於是采訪故老尋履往
迹而遠感深慨痛心隕涕遂寫集聞見作賦撰西征俾
事運遷謝託此不朽其辭曰

系烈山之洪緒承火正之明光立熙載於唐后申讚事

於周王疇庸命而順位錫寶珪以徹疆厯尚代而平顯
降中葉以繁昌業服道而德徽風行世而化揚投前蹤
以永冀省輜質以遠傷睽謀始於著蔡違用舍於行藏
庇常善之罔棄憑曲成之不遺昭在幽而偕煦賞彌久
而愈私顧晚草之薄弱仰青春之歲蕤引蔓穎於松上
擢纖枝於蘭逵施隆貸而有渥報涓塵而無期歡太階
之休明穆皇道之緝熙惟王建國辨方定隅內外既正
華夷有殊惟昔小雅逮於班書戎蠻孔熾是殛是誅所

以宣王用棘於獫狁高帝方事於匈奴然侵鎬至涇自

塞及平關郊伺鄙

原本闕四字

慕攜王之矯虔階喪亂之未

寧竊強秦之三輔陷隆周之兩京雄嶠澠以制險據繞

雷而作局家永懷於故壤國願言於先塋俟太平之曠

期屬應運之聖明坤寄通於四瀆乾假照於三辰水潤

土以顯比火炎天而同人惟上相之叡哲當草昧而經

綸總九流以貞觀協五材而平分時來之機悟先於介

石納隍之誠一援於生民龜策允臧人鬼同情順天行

誅司典詳刑樹牙選徒秉鉞抗於弧矢聲楚孝之心智
戈棘殫吳子之精靈迅三翼以魚麗襄兩服以鴈逝陣
未列於都甸威已振於秦薊灑嚴霜於渭城被和風於
洛汭就終古以比猷考墳冊而莫契昔西怨於東徂今
北伐而南悲豈朝野之恒情動萬乘之幽思歌零雨於
豳風興採薇於周詩慶金墉之凱定眷戎車之遷時佇
千里而感遠涉弦望而懷期詔微臣以勞問奉王命於
河湄夕飲餞以俶裝旦出宿而言辭歲既晏而繁慮日

將邁而戀乖闕敬恭於桑梓謝履長於庭階冒沈雲之
晦藹迎素雪之紛霏凌結端而凝清風矜籟以揚哀情
在本而易阜物雖末而難懷眷余勤以就路苦憂來其
城頽爾乃經雉門啓浮梁眺鍾巖越查塘覽永嘉之柰
維尋建武之緝綱於時內慢神器外侮戎狄君子橫流
庶萌分析主晉有祀福祿來格明兩降鑒三七辭厄元
誕德以膺緯肇回光於陽宅明思服於下武興繼代以
消逆簡文因心以秉道故恩用而刑廢孝武舍已以仗

賢亦寧外而治內觀日化而就損庶雍熙之可對閔隆
安之致寇傷龜玉之毀碎漏妖凶於滄洲纏釁難而盈
紀時焉依於晉鄭國有蹙於百里賴英謨之經營弘兼
濟以忘已主寰內而緩虞澄海外以清滓至如昏侵蔽
景昃祚傾基黍離有歎鴻鴈無期瞻天命之貞符秉順
動而履機率駿民之思效普邦國而同歸盪積霾之穢
氛啓披陰之光暉反平陵之杳藹復七廟之依稀務役
簡而農勸每勞賞而忠甄燮時雍於祖宗

原本闕
六字

埽逋

醜於漢渚滌僭逆於岷山羈巢處於西木引鼻飲於源
淵惠要襟而思韃援冠弁而來虔視治城而北屬懷文
獻之收揚匪元首之康哉孰股肱之惟良譬觀曲而識
節似綴組以成章業彌纏而彌微事愈有而莫傷次石
頭之雙岸究孫氏之初基幸漢庶之漏網憑江介以抗
維初鵲起於富春果鯨躍於川湄匝三世而國盛厯五
偽而宗夷察成敗之相仍猶脣亡而齒寒載十二而謂
紀豈蜀滅而吳安衆咸昧於謀兆羊獨悟於理端請廣

武以誨情樹襄陽以作藩拾建業而如遺沿萬里而誰
難疾魯荒之詖辭惡京陵之譖言責當朝之憚貶對曩
籍而興歎敦怙寵而判違敵既勅而國圯彼問鼎而何
階必先賊於君子原性分之異託雖殊塗而歸美或卷
舒以愚智或治亂其如矢謝昧迹而託規卒安身以全
里周顯節而犯逆抱正情而喪已薄四望而尤眇歎王
路之中鯁蠹百越之妖燼敢凌蹈於五嶺崩雙嶽於中
流擬凶威於荆郢隱雷霆於帝座飛鉞鏃於宮省於時

朝有遷都之議人無守死之志師旅痛於久勤城墉闕
於素備安危勢在不侔衆寡形於見事於赫淵謀研其
神策緩轡待機追奔躡迹遇雷池而振曜次彭蠡而殲
滌穆京甸以清晏撤多壘而寧役造白石之祠壇懟二
豎之無君踐掖庭以幽辱凌祧社而火焚愍文康之罪
已嘉忠武之立勲道有屈於災蝕功無謝於如仁訊落
星之饗旅索舊樓於吳餘迹階祀而不見橫榛莽以荒
除彼生成之樂辰亦猶今之在余慨齊吟於爽鳩悲唐

歌於山樞弔偽孫於徐首率君臣以奉疆時運師以伐
罪偏投書於武王迄西北之落紐之東南以振綱誠鉅
平之先覺實中興之後祥據左史之攸徵胡影迹之可
量過江乘而責始知遇雄之無謀厭紫微之宏凱甘陵
波而遠遊越雲夢而南泝臨浙河而東浮鼓連弩於川
上侯蛟龍於中流爰薄方輿迺屆歐陽入夫江都之域
次乎廣陵之鄉易千里之漫漫泝江流之湯湯潯赤圻
以經復越二門而起漲眷北路以興思看東山而怡目

林叢薄路逶迤石參差山盤曲水激瀨而駿奔日映石
而知旭審兼照之無偏怨歸流之難濯羨輕魴之涵泳
觀翔鷗之落啄在飛沈其順從顧微躬而緬邈於是抑
懷蕩慮揚摧易難利涉以吉天險以艱於敵伊阻在國
斯便勾踐行霸於琅邪夫差爭長於黃川葛相發歎而
思正曹后愧心於千魂登高堞以詳覽知吳淠之衰盛
戒東南之逆氣成劉后之駭聖藉鹽鐵之殷阜臨淮楚
之剽輕盛几杖而弭心怒抵局而遂爭忿爰盜之扶禍

惜徒傷於家令匪條侯之忠毅將七國之陵正褒漢藩
之治民並訪賢以招明侯文辯其誰在曰鄒陽與枚生
據忠辭於吳朝執義說於梁庭敷高才於兔園惟正言
而免刑闕里既已千載深儒流於末學欽仲舒之辟容
遵縫掖於前躅對園囿而不闕下帷幙而論屬相端非
之兩驕遭弘偃之雙慝恨有道之無時步險塗以側足
聞宣武之大閱反師旅於此屢自皇運之都東始昌業
以濟難抗素旄於秦嶺揚朱旗於巴川懼帝系之墜緒

故默昏而崇賢嘉收功以垂世嗟在嗣而覆旃德非陟
而繼宰釁踰禹其必顛造步兵而長想欽太傅之遺武
思嘉遜之餘風紹素履之落緒民志應而願稅國屯難
而思撫譬乘舟之待楫象提釣之假縷總出入於和就
兼仁用於默語弘九流以挈四維復先陵而清舊宇却
西州之成功指東山之歸予惜圖南之啓運恨鵬翼之
未舉發津潭而迴邁逗白馬以憇舲貫射陽而望邗溝
濟通淮而薄甬城城陂阨兮淮驚波平原遠兮路交過

面光野兮悲橋梓遡急流兮苦磧沙夏千里而無山緬

百谷而有居被宿莽以迷徑覩生煙而知墟

原本闕
六字

謂

信美其可娛身少長於樂土實長歎於荒餘

原本闕
四字

具

瘁值歲寒之窮節視曾雲之崔巍聆悲飈之掩肩彌晝

夜以滯淫怨凝陰之方結望新晴於落日起明光於躋

月眷轉蓬之辭根悼朔鴈之赴越披微物而疚情此思

心其可說問徭役其幾時駭閱景於興沒感曰歸于采

薇予來思于雨雪豈初征之懼對冀鶴鳴之在埵

原本
闕四

字踰宿驚吾楫於邳鄉奚車正以事夏虺左相以輔湯
繇三代而享邑厠踐土之一匡嗟仲幾之寵侮遂舍存
以徵亡喜薛宰之善對美士彌之能綱升曲垣之逶迤
訪淮陰之所都原入跨之達恥俟遭時以遠圖舍西楚
以擇木迨南漢以定謨亂孟津而魏滅攀井陘而趙徂
播靈威於齊橫振餘猛於龍且觀讓通而告獮曷始智
而終愚迄沂上而停柩登高圯而不進石幽期而知賢
張揣景而示信本文成之素心要王子於雲輶豈無累

於清霄直有槩於貞吝始熙績於武關卒敷功於皇盾
處夷險以解挫弘憂虞以時順矜若華之翳晷哀飛驂
之落駿傷粒食而興念眷逸翮而思振戾臣山而東顧
美相公之前代嗟殘虜之將糜熾餘焱於海濟驅鮎稚
於淮曲暴鰥孤於泗滙託末命

原本闕
二字

雲冀靈武之北

驅惟授首之在晨當盛暑而選徒肅嚴威以振響漸溫
澤而沾腴既雲撤於朐城遂席卷於齊都曩四闕其奚
阻道一變而是孚傷炎季之崩弛長逆布以滔天假父

子以詐愛借兄弟以偽恩相魏武以譎狂宄謨奮於東
藩桴未課於東郭身已馘於樓門審貢牧於前說證所
作於舊徐聆泗川之浮磬翫夷水之蠙珠草漸苞於埴
壤桐孤榦於嶧隅慨禹迹於尚世惠遺文於夏書紛征
邁之淹留彌懷古於舊章商伯文於故服咸徵名於彭
殤眺靈壁之曾峰投呂縣之迅梁想蹈水之行歌雖齊
汨其何傷啓仲尼之嘉問告性命以依方豈苟然於迂
論聆寓言於達莊於是濫石橋登戲臺策馬釣渚息轡

城隅永感四山零淚雙渠怨物華之推驛慨舟壑之遞
遷謂徂歲之悠闊結幽思之方根感皇祖之徽德爰識
冲而量淵降俊明以鏡鑑迴風猷以昭宣道既底於國
難患有覃於黎元士頌歌於政教民謠詠於渥恩兼采
芑之致美協漢廣之發言強虎氏之搏翼瀟雲網於所
禁驅黔氓以蘊崇取園陵而湮沈錫殘落於河西序淪
胥於漢陰攻方城而折扃擾譙潁其誰任世闕才而貽
亂時得賢而興治救祖考之邦壤在幽人而枉志體飛

書之遠情悟犒師之通識迨明達之高覽契古今而同
事拔淵謨於潛幾騁神鋒於雲旆驅斥澤而風靡蹙坑
谷而鳥竄中華免夫左社江表此焉緩帶既剋黜於肥
六又作鎮於彭沛晏皇塗於國內震天威於河外埽東
齊而已寧指西嶠而將泰值秉均而代謝實大業之興
廢心無忝於樂生事有像於燕惠抱明哲之不伐奉宏
勲而是稅捐七州以爰來歸五湖以投袂屈盛績於平
生申遠期於暮歲訪曩載於宋鄙採陽秋於魯經晉申

好於東吳鄭憑威於南荆故反師於曹門將以塞於夷
庚納五叛以長寇伐三邑以侵彭美西鉏之忠辭快韓
厥之奇兵追項王之故臺迹霸楚之遺端挺宏志於總
角奮英勢於弱冠氣蓋天而倒日力拔山而傾湍始颶
起於勾越中電激於衡闕興偏慮於攸吝忘即易於所
難忌陳錦而莫照思反鄉而有歎且夫殺義害嬰而悞
豐疑縹賢不策失位誰持迨理屈而愈閉方怨天而懷
悲對駿騅以發憤傷虞姝於末詞陟亞父之故營諒謀

始之非托遭衰羸之崩網值威炎之結絡迄皓首於阜陵猶謬覺於然諾視一人於三傑豈在已之庸弱置豐沛而不舉故自同於俎鑊發卞口而游歷迄西山而弭轡觀終古之幽憤懷元王之冲粹丁戰國之權爭方恬心於道肆學浮丘以就德友三儒以成類潔流始於初源累仁基於前美撥楚族之休烈傳芳素於來祀彊見譽於清虛德致稱於千里或避寵以辭姻或遺榮而不仕政直言以安身駿絕才以喪已驅信道之成終表昧

世之虧始悟介焉之已差則不俟於終日既防萌於未
著雖念德其何益爾乃孟陬發節雷隱蟄蟄散葉美柯
芳藹節萌麥萋萋於旄丘柳依依於高城相睢鳩之集
河觀鳴鹿之食苹沂泗遠兮清川急秋冬近兮緒風襲
風流蕙兮水增瀾誨愁衿兮鑑戚顏愁盈根而蘊際戚
發條而成端嗟我行之彌日待征邁而言旋荷慶雲之
優渥周雙七於此年陶逸豫於京甸違險難於行川轉
歸弦而眷戀望修檣而流連願關鄴之遙清遲華鑾之

凱旋穆淳風於六合溥洪澤於八埏頒賢愚於大小順
規矩於方圓固四民之獲所宜稅稷於萊田苦邯鄲之
難步庶行迷之易痊長守樸以終稔亦拙者之政焉

述征賦

明徐禎卿

歲大呂之季律予戒行於上都愬北風之僚慄掩霏雪
以遐徂愁長路之不極詠役車於周詩聊騁目以宣憂
愴懷土而興思厯維揚之故域背大江之皇陂悲窮野
之寥闐鮑淮陰之城隅訪王孫之遺蹟謁漂母於空祠

哀智傑之有窮豈民生之多罹惟往昔而顧念心搖搖而夕悲逮明發而振楫遂慷慨以遐辭

小征賦

有序

明
皇甫湜

予以孟冬治逋於衛墟作小征賦

歲孟冬之慘烈兮予有事乎汲城晨雨露之遙阻兮暮指途而遂征風飄飄以升輿兮日杳杳而抗旌露夜下而羈旅兮魂營營之靡寧詠詩人之遙役兮瞻岵岵而疚情徧黃丘而息駕兮矚行阜而南邁伊故鄉之永懷

兮氣交憤而長喟雪氛氲而蔽天兮憫征人之無衣野
寂寞其遼迴兮雲孤泊而靡依感鴻鳥之違寒兮鳴邕
邕以羣飛過邑墟而有懷兮訊滑臺以延佇漸淇水之
湯湯兮激衝波於迴渚美氓蚩之困悔兮悟漢廣於求
女願履幽而反正兮年冉冉而不與遵河津以遐驚兮
停予車於衛郊諒取辟之不遠兮信昊天之孔昭彼既
耄而警訓兮宜令名之益邵嗟弱植之易遷兮憚我辰
之不遭期浚谷之考槃兮隘碩人之弗告苟委順而弘

觀兮從吾好而自足終秉耒以絕榮兮永放歌於巖曲

御定歷代賦彙外集卷九

謹案第十一頁後八行顧請旋於僊汜按五臣文
選僊作僊





總校官庶吉士臣張能照
校對官編修臣楊壽楠
謄錄監生臣阮坦